


অর্থনীতি ও নৈতিকতা



আবদুল আউয়াল মিন্টু
সাবেক সভাপতি, এফবিসিসিআই

সূচি

১. অর্থনীতিবিদদের ভূমিকা
২. অর্থনীতি বনাম রাজনীতির নৈতিকতা
৩. অর্থনীতি বনাম সামাজিক নৈতিকতা
৪. সামাজিক মূলধন ও অর্থনৈতিক উৎপাদনশীলতা
৫. অর্থনীতি ও নৈতিকতা — মুনাফা
৬. মুনাফা — নিয়ামক বনাম নৈতিকতা
৭. আর্থ-সামাজিক রূপান্তর ও নৈতিকতা
৮. ক্ষমতার কেন্দ্রায়ন — সম্পদ ও আয় বিলি-বণ্টনের নৈতিকতা
৯. দুর্নীতি, রাজনীতি ও নৈতিকতা
১০. নৈতিকতার পূর্বশর্ত — রাজনৈতিক ক্ষমতার ভারসাম্য বিধান
১১. মানবীয় জীবন-জীবিকার ক্রম-উত্তরণ ও অর্থনৈতিক তৎপরতার আবির্ভাব — প্রাচীনকাল
১২. সম্পদ ও আয়ের বণ্টনে অসমতা — প্রাচীনকাল
১৩. মজুরি ও মুনাফার বিলি-বণ্টনে অসমতা — সাম্প্রতিককাল
১৪. ক্ষমতার অপব্যবহার ও সম্পদ নিয়ন্ত্রণের অনৈতিকতা
১৫. নৈতিকতার দিক ও মাত্রা
১৬. সম্পদ সৃষ্টির প্রক্রিয়া
১৭. সম্পদ সৃষ্টি ও আয়ের অসমতা
১৮. সম্পদ সৃষ্টি ও নৈতিকতা
১৯. প্রাচীনকাল বনাম সাম্প্রতিককাল
২০. অগণতান্ত্রিক একনায়কত্বের অনৈতিকতা
২১. উপসংহার

অর্থনীতি ও নৈতিকতা

- আবদুল আউয়াল মিন্টু

সাবেক সভাপতি, এফবিসিসিআই

সংক্ষিপ্তসার

অর্থনীতিবিদগণ প্রায়ই উদ্যোক্তা, ব্যবসায়ী, বাজার, সরকার, বাণিজ্যিক প্রতিষ্ঠান, সবার নানা গলদ-ত্রুটি ও নৈতিকতা নিয়ে প্রশ্ন করেন। তাঁদের ধারণানুযায়ী জনসাধারণ সর্বদাই নিজ নিজ স্বার্থহাসিলে নিয়োজিত থাকেন। তবে এসব কথা তাঁরা এমন অধরা (অস্পষ্ট) ভাষায় বলেন বিধায় সাধারণ মানুষ বোঝেনা, ফলে এসব ধ্যান-ধারণা ফুলেফলে বিকশিত হয় না। যদিও সমাজ পরিচালনার ক্ষেত্রে অর্থনীতিবিদদের ভূমিকা অত্যন্ত গুরুত্বপূর্ণ সত্ত্বেও বর্তমান বাংলাদেশে তাঁরা সেই ভূমিকা পালনে ব্যর্থ বলে প্রতীয়মান।

অর্থনীতি ও বাস্তব পৃথিবীর মধ্যে সেতুবন্ধন তৈরির ক্ষেত্রে রাজনীতি এক গুরুত্বপূর্ণ ভূমিকা পালন করে। এ দুটো বিষয়, একে অন্যের উপর নির্ভরতা ও গভীর সম্পর্ক, দীর্ঘদিন ধরে অর্থনীতিবিদগণ এড়িয়ে গেছেন। যদিও এ দুটি অংগ একে অপরের সম্পূরক। যে কোন একটার সীমাবদ্ধতা বা সংকীর্ণতা মানেই হলো অসম, অস্থির, দুর্বল ও বৈষম্যের সমাজ। যে কোনো দেশে আর্থ-সামাজিক পরিবর্তনের চাবিকাঠি সেই দেশের রাজনীতির কাঠামোতে নিহিত। মানুষ তাঁর চিরাচরিত বৈশিষ্ট্য হিসেবে সুযোগ পেলেই এককভাবে আধিপত্য বিস্তারের চেষ্টা করে। যখন রাজনৈতিক ক্ষমতার ব্যবহারে ভারসাম্যের বিধান থাকে, তখন কোন একক গোষ্ঠীর পক্ষে তা সম্ভব হয় না। বরং সামাজিক গোষ্ঠীগুলো একে অপরের সাথে সহযোগিতা করতে বাধ্য হয়। সমাজে বিভিন্ন গোষ্ঠীর পারস্পরিক সহযোগিতা, সামাজিক ও অর্থনৈতিক তৎপরতার উৎকর্ষগত গুণমানকে বিশেষভাবে উন্নত করে। ভৌত অবকাঠামোর মতো সমাজ অবকাঠামো ও সামাজিক মূলধন অর্থনৈতিক উৎপাদনশীলতা বৃদ্ধি করে।

উদার অর্থনৈতিক সমাজের বিরুদ্ধে যুক্তি হলো ঐ সমাজের অর্থনীতি মুনাফার দ্বারা পরিচালিত। মুনাফা মানেই লিপ্সা। তাই মুনাফা অনৈতিক। মুনাফার সঙ্গে লোভের সম্পর্ক চিরাচরিত। অন্যদিকে তত্ত্ব হলো মুনাফা “নিয়ামকের” ভূমিকা পালন করে। সবাই চায় যে ব্যবসায়ীদের মাঝে নৈতিকতাবোধ থাকা উচিত। সমাজে ধনি-দরিদ্রের বৈষম্য ও আয়ের সমতা-অসমতা থেকে নৈতিকতার প্রশ্ন উঠে। কিন্তু প্রত্যাশাকৃত এই নৈতিকতার পরিমাপ ও পরিধি কি হবে তা কেউ জানে না। নৈতিকতার নানা দিক ও মাত্রা আছে। ব্যক্তিগত সততা, ন্যায্য আচরণ, ন্যায়ভিত্তিক সমাজব্যবস্থা, যথাসময় দেনা পরিশোধ, এ সবই যেমন মানুষের ব্যক্তিগত নৈতিকতার সাথে জড়িত, তেমনি দেশের রাজনীতি ও অর্থনীতির সাথে সম্পর্কিত। তবে কোনো পরিমাণের নৈতিকতাই মানুষের আয়ে সমতা আনবেনা, ধনী ও দরিদ্রের ব্যবধান কমবে না। বৈষম্যহ্রাসের মূল চাবিকাঠি মূলত ন্যায়ভিত্তিক সমাজে অধিকতর উৎপাদনের মাঝে নিহিত।

কুলিন ও অভিজাত মহলের হাতে যখন ক্ষমতা কেন্দ্রীভূত থাকে, তারা সে ক্ষমতার অপব্যবহার করে অনৈতিক ভাবে অতিরিক্ত সম্পদ করায়ত্ত্ব করে। তাতে সমাজের রন্ধ্রে রন্ধ্রে দুর্নীতি ছড়িয়ে পড়ে। দুর্নীতি গণতন্ত্র ও উন্নয়নের পথে সবচেয়ে বিপদজনক বাধা। দুর্নীতি সম্পদের অবৈধ সঞ্চয় ঘটায়, সংগঠিত ও সংঘবদ্ধ অপরাধের প্রসার ঘটায়, আইনের বিকৃতি ঘটায়। অবৈধ টাকার মালিকরা হয়ে ওঠে প্রতিনিধিত্বশীল কর্তৃপক্ষের চেয়েও বেশি গুরুত্বহীন। অনৈতিক রাজনীতিই হলো দুর্নীতির মূল উৎস।

বাংলাদেশে কতিপয় ব্যক্তির হাতে পুঞ্জীভূত ক্ষমতা, তাঁদের স্বৈরতান্ত্রিক ও অসাংবিধানিক আচার-আচারণ, সামাজিক বিশৃঙ্খলা, আইনের শাসনের দুর্বলতা, অকার্যকর প্রতিষ্ঠান ও নিচুমানের দুর্বল শাসন ব্যবস্থা দেশের শ্রমজীবী মানুষগুলিকে তাদের প্রাপ্য সামাজিক ন্যায়বিচার, সম্প্রীতি, নিরাপত্তার পরিবেশ ও নিত্যনূতন প্রযুক্তি উদ্ভাবনের সুফল কেড়ে নিচ্ছে। এসবই নৈতিকতার সাথে জড়িত।

অতএব সমাজে নৈতিকতার দিকমাত্রা বাড়াতে হলে সুশীল সমাজের সবাইকে ঐক্যমত্যের ভিত্তিতে দেশের রাজনীতি, আইনের শাসন, সামাজিক মূলধন সৃষ্টি, উৎপাদন প্রক্রিয়া ও অর্থনৈতিক উন্নয়নের পথে সকল বাধাবিপত্তি সরাতে হবে। তাতে একদিকে সামাজিক অস্থিরতা প্রশমিত হবে, বিনিয়োগ ও সম্পদ বাড়বে, আয়ের বিলি-বন্টনে বৈষম্য কমবে এবং নৈতিকতার উৎকৃষ্টতার পরিধি বাড়বে।

বিষয়সূচক শব্দগুলো: অর্থনীতিবিদদের ধারণা ও ভূমিকা, রাজনীতি ও অর্থনীতি একে অন্যের নির্ভরতা ও গুরুত্ব, ক্ষমতার ভারসাম্য ও দুর্নীতি, মুনাফা ও নৈতিকতা, ঐক্যমত্যের রাজনীতি, আয়ের বিলি-বন্টন ও নৈতিকতা।

অর্থনীতিবিদদের ভূমিকা

অর্থনীতিবিদগণ প্রায়ই উদ্যোক্তা, ব্যবসায়ী, বাজার, সরকার, বাণিজ্যিক প্রতিষ্ঠান ইত্যাদি সবার নানা গলদ-ত্রুটি বের করেন। কিন্তু যখন তাদের বিরুদ্ধে কোনো কথা ওঠে, কোন অভিযোগ করা হয় - তাঁরা মনে করেন তাঁদের প্রতি সুবিচার করা হচ্ছে না। কারণ, তাঁরা দাবি করেন দেশে যা কিছু খারাপ ঘটে, তা হোক মন্দা অর্থনীতি অথবা বিনিয়োগে স্থবিরতা, সেগুলোর কারণ আর যা-ই হোক তাঁরা নন। তাঁরা বড় জোর সে সব অশুভ বার্তা-আভাসের বাহক মাত্র। তাঁদের মতে, রাজনীতিকরাই বাস্তবে অর্থনীতির ব্যবহারিক প্রয়োগ করেন। আর জনসাধারণ তাদের দৈনন্দিন অর্থনৈতিক কাজকর্ম ও লেনদেন করতে গিয়ে সর্বদাই নিজ নিজ স্বার্থহাসিলে নিয়োজিত থাকেন। ব্যবসায়ীদের কোন নৈতিকতা নেই। তাঁরা অর্থনৈতিক মুনাফা করার লক্ষ্যে পণ্য ব্যবহারকারী গ্রাহকদের বিরুদ্ধে সর্বদা চক্রান্তে লিপ্ত থাকেন। বিনিয়োগকারীরা ব্যাংক ও অন্যান্য ঋণ প্রদানকারী সংস্থা থেকে টাকা নিয়ে অবৈধ ও অন্যায্যভাবে সেই টাকাকে অন্যত্র কাজে লাগান। অনেক সময় টাকা ফেরৎ না দিয়ে বিদেশে পাচার করে দেয়। তাঁদের মুনাফা করার লোভ-লালসা ও অভিশাপ সমাজে অসমতা ও বৈষম্য সৃষ্টি করে।

তবে অর্থনীতিবিদগণ এ সব বার্তাগুলি আমাদেরকে এমন অধরা (অস্পষ্ট) ভাষায় বলেন যা সাধারণ মানুষ অর্থাৎ যারা দৈনন্দিন অর্থনৈতিক কাজ সম্পাদন করেন তাদের পক্ষে ঐ বক্তব্যের অর্থ বোঝা সম্ভব হয় না। বাস্তবিক পক্ষেই ঐ সব বক্তব্যের অর্থনৈতিক মূল্য যে কি তা তাঁদের অজানা বিষয়। আমি সাধারণ গড় মানুষের কথা বলছি, যারা বড়োজোর অর্থনীতি শাস্ত্রের প্রাথমিক পাঠ সম্পর্কে কিছু সম্যক জ্ঞান রাখেন। যেমন পারস্পরিক লাভ, শ্রমের বিভাজন, অপটুনিটি কস্ট (Opportunity Cost), উপাত্তিক উপযোগ, কর, প্রতিযোগিতা, উৎসাহদানমূলক ব্যবস্থা, লেনদেন তথা ব্যবসায়িক পরিচালনার খরচ ইত্যাদি। সে কারণে যখন কোনো অত্যন্ত খ্যাতিমান অর্থনীতিবিদ নানা

ধরণের বিষয়ের ওপর অধরা ভাষায় - ভাব, প্রেক্ষিত ও প্রাসঙ্গিকতায় বক্তব্য পেশ করেন তখন দিনের পর দিন - প্রতিদিন যারা অর্থনীতি বাস্তবে চর্চা করেন অর্থাৎ রাজনীতিবিদ, সরকারি / লোক কর্মকর্তা, ব্যবসায়ী সমাজের নেতা, পরিবেশ সক্রিয়তাবাদী, ভোক্তাদের প্রবক্তা, আইনবিশারদ, ঋণখেলাপি ও সাধারণ নাগরিক তাঁর বক্তব্যের সত্যিকার সাদামাটা অর্থ কি তা বুঝতে পারেন না। ফলে, ঐ অর্থনীতিবিদ যে সব চমৎকার ধ্যানধারণার কথা বলেন তা আর ফুলেফলে বিকশিত হয় না। তাঁদের পরামর্শ অপাত্রে বর্ষিত হয়।

তবু এ কথা সত্যি অর্থনীতিবিদগণ বিভিন্ন আর্থ-সামাজিক বিষয়ে তাঁদের শক্তিশালী বিচার- বিশ্লেষণের মাধ্যমে সরকারি নীতির ওপর আলোকপাত করে ঐসব বিষয়গুলি জনআলোচনায় এনে অনেক গুর ত্বপূর্ণ ভূমিকা পালন করেন। এদিক থেকে বলা যায় যে অর্থনীতিবিদগণ অর্থনৈতিক ও সামাজিক দৃষ্টিকোন থেকে গুর ত্বপূর্ণ তথ্যগুলিকে বিচার বিশ্লেষণ করে তাদের মতামত দিতে পারেন। আর সেগুলি এক পর্যায়ে অসীম শক্তিশালী হয়ে যারা নিত্য অর্থনীতির ব্যবহারিক প্রয়োগ ও চর্চা করেন তাদের উপর প্রচণ্ড চাপ সৃষ্টি করতে পারে। এফ এ হায়েক অর্থনীতি শাস্ত্রে তাঁর তর গ অনুসারীদের এই বলে সতর্ক করে দিয়েছেন যে “কোনো বিষয়ে কেউ কঠোর বিতর্কের অবতারণা করলে তাকে প্রায় সুনিশ্চিতভাবেই একঘরে ও কোনঠাসা হয়ে পড়তে হবে, তার জনপ্রিয়তা থাকবে না”। অবশ্য তারপরেও তিনি বলছেন, “অর্থনীতিবিদকে তার উদ্যোগ ও প্রয়াসে জনসমর্থন ও সহানুভূতি কী পাওয়া গেল তা নিয়ে মাথা ঘামালে চলবে না”। এ হলো জ্ঞানের নৈতিক দিক, যাকে সম্মুন্ন রাখতে হবেই”।

কয়েক বছর আগে আমি ডেইলি স্টার পত্রিকায় একটি নিবন্ধ পড়েছি। নিবন্ধটি ইস্ট ওয়েস্ট ইউনিভার্সিটির সমাবর্তনে দেশের একজন বিশিষ্ট অর্থনীতিবিদের অভিভাষণকে ভিত্তি করে লেখা। জাতীয়-আন্তর্জাতিক ক্ষেত্রে তাঁর সুনাম, নিরপেক্ষ চরিত্র, রাষ্ট্রনায়কসুলভ মনোভাব ও দেশী-বিদেশী রাজনৈতিক বিষয়ে সম্যক জ্ঞানের কারণে আমার ধারণা তাঁর নিবন্ধটি পাঠককূল নিশ্চয়ই পছন্দ করেছে। নিবন্ধটি আমি বেশ কয়েকবার পড়েছি। বার বার পর্যালোচনা করে নিবন্ধটির গূঢ় ভাবার্থ আমি উপলব্ধি করার চেষ্টা করেছি। আমার কাছে মনে হয়েছে তিনি অ্যাডাম স্মিথ থেকে গুর করে রিকার্ডো, রিকার্ডো থেকে ম্যালথুস, উন্নত ও উন্নয়নশীল দেশের ধনী-গরিব সবাকেই কোন না কোনভাবে অভিযুক্ত করেছেন। শেষ পর্যন্ত দেশের অর্থনৈতিক দৈন্যতার জন্য অনেকাংশেই দোষ চাপিয়েছেন ব্যবসায়ী-শিল্পপতিদের ঘাড়ে। অথচ অর্থনীতিবিদদের মতবাদকে কার্যকরভাবে প্রয়োগ করে এই গোষ্ঠি সদা-সর্বদা দেশের জন্য সম্পদ সৃষ্টি ও কর্মসংস্থানের ব্যবস্থা করার কাজে নিয়োজিত। তিনি আর্থ-সামাজিক উন্নয়নে বিভিন্ন নীতিমালার প্রণয়ন ও বাস্তবায়নে অর্থনীতিবিদদের ভূমিকা খুব সামান্য বলেই উল্লেখ করেছেন। অর্থনীতিবিদদের তিনি ‘বার্তা বাহক’ ছাড়া অন্য কোন কিছু হিসেবে দেখতে পান না। তারপরেও সামাজিক ও নৈতিক কিছু বিষয় যা মানুষের জীবনযাত্রার মানের ওপর সরাসরি প্রভাব ফেলে সে সব বিষয়ে একজন অর্থনীতিবিদ হিসেবে তিনি যে উদ্বেগ ও উৎকর্ষায় ভুগছেন তা আমার সবিশেষ মনযোগ আকর্ষণ করেছে।

আমাদের সমাজে তাঁর মতো একজন অর্থনীতিবিদের মতামত যে এক সুগভীর প্রভাব বিস্তার করার সামর্থ্য রাখে তাকে খাটো করে দেখার কোনো অবকাশ নেই। তিনি তত্ত্বাবধায়ক সরকারের সময়ে অর্থনীতি বিষয়ক উপদেষ্টার দায়িত্ব পালন করেন। তিনি বিভিন্ন সময়ে সরকারের বহু গুর ত্বপূর্ণ দায়িত্ব পালন করেন। তিনি বাংলাদেশ ব্যাংকের (যে প্রতিষ্ঠান মুদ্রানীতি প্রণয়ন ও বাস্তবায়ন করে এবং গোটা ব্যাংকিং ব্যবস্থা নিয়ন্ত্রণ ও পরিচালনা করে) পরিচালক ছাড়াও দেশের ব্যাংক, অর্থ সংক্রান্ত নীতি প্রণয়ন ও বাস্তবায়নের দায়িত্বে নিয়োজিত বিভিন্ন কমিটিতে দায়িত্ব পালন করেছেন। এ ছাড়াও তিনি প্রায়শই সভা-সমিতি-সেমিনারে গুর ত্বপূর্ণ মন্তব্য বা সুপারিশ রাখেন। অর্থনৈতিক দিক থেকে যে কোন গুর ত্বপূর্ণ বিষয়ে তাঁর মতামত গুর ত্বের সাথে আমরা আলোচনা ও বিবেচনা করি। তাঁর মতো আরো বহু অর্থনীতিবিদ আছেন যারা অনেকে সুশীল সমাজের বিজ্ঞ সদস্যদের সঙ্গে সরকারের বিভিন্ন সংস্থাকে উপদেশ-পরামর্শ দেন। এর মধ্যে অনেকেই দেশের বেশ কিছু বড় ব্যাংকের পরিচালক অথবা চেয়ারম্যানের দায়িত্বও পালন করছেন। অনেকে বিভিন্ন সময়ে সরকারের বিভিন্ন কমিটির প্রধান হিসেবে সিদ্ধান্ত-পরামর্শও দিচ্ছেন। বেশ কয়েকজন অর্থনীতিবিদ বাংলাদেশের অর্থ মন্ত্রীর পদও অলংকৃত করেছেন। এ অবস্থায় একজন অর্থনীতিবিদের পেশা ও দায়িত্বকে শুধু ‘বাহক’ হিসাবে মেনে নিতে ও বুঝতে কষ্ট হয় বৈকি। বরং আমি মনে করি অর্থনীতিবিদদের সমাজ পরিচালনার ক্ষেত্রে একটা অত্যন্ত গুর ত্বপূর্ণ ভূমিকা রয়েছে, শুধুমাত্র ‘বাহক’ নয়। যদিও আপাতদৃষ্টিতে এমূহর্তে বাংলাদেশে অর্থনীতিবিদরা সেই ভূমিকা পালন ব্যর্থ বলে প্রতীয়মান।

অর্থনীতি বনাম রাজনীতির নৈতিকতা

অর্থনীতি ও বাস্তব পৃথিবীর মধ্যে শক্তিশালী সেতুবন্ধন তৈরির ক্ষেত্রে সবসময়ই রাজনীতি এক গুরুত্বপূর্ণ ভূমিকা পালন করে। যে কোন সমাজেরই একটা অর্থনৈতিক ও একটা রাজনৈতিক কাঠামো থাকে। এই কাঠামো একই সঙ্গে সে সমাজের বাজার ব্যবস্থা ও সরকারের দৃষ্টিভঙ্গির বহিঃপ্রকাশ ঘটায়। তাই সমাজ, ধনীই হোক আর গরিবই হোক, অবশ্যই তার দু'টি অংগ থাকবে। অপরিহার্য এই অংগ দু'টি হচ্ছে- অর্থনীতি আর রাজনীতি। অর্থনীতির মাধ্যমে রাজনীতি বিকশিত হয় তবে রাজনীতি অর্থনীতিকে নিয়ন্ত্রণ করে। তাই আমার বিশ্বাস কোন বাজার আদর্শই রাজনীতিকে বাদ দিয়ে বিকশিত হতে পারে না। এ দুটি অংগ একে অপরের সম্পূরক। যে কোন একটার সীমাবদ্ধতা বা সংকীর্ণতা মানেই হলো অসম, অস্থির, দুর্বল ও বৈষম্যের সমাজ।

অ্যাডাম স্মিথ, জন স্টুয়ার্ট মিল ও আগের শতকের অন্যান্য বিখ্যাত অর্থনীতিবিদরা ব্যবসা, বাণিজ্য, বাজার পরিচালনা ইত্যাদি নিয়ে তাঁদের বিশ্লেষণমূলক লেখায় সে সময়ের সরকার-রাজনীতিসহ বিভিন্ন প্রতিষ্ঠান, সেগুলোর গঠন ও কার্যকলাপ প্রক্রিয়াকে গুরুত্বের সাথে হিসেবে এনেছেন।

তাছাড়া শ্রমিকদের বিশেষত্ব অর্থনীতিতে অতি গুরুত্বপূর্ণ ভূমিকা পালন করে। এ দুটো বিষয়ের - একে অন্যের উপর নির্ভরতার গুরুত্ব ও গভীর সম্পর্ক দীর্ঘদিন ধরে অর্থনীতিবিদগণ এড়িয়ে গেছেন। হালে এই বাস্তব বাণ্য বিষয়টি ব্যাপক পর্যায়ে আলোচিত হচ্ছে। বিশ শতকের অর্থনীতিবিদ জোসেফ শুমপিটার প্রথম এ বিষয়ে বিশদ পর্যালোচনা করেন। তারপর থেকে অর্থনীতিবিদরা যে কোন দেশের জন্য নূতন অর্থনৈতিক মডেল বা নীতি তৈরি করার সময়ে সে দেশের ব্যবসা, বাণিজ্য, রাজনীতি, শ্রমিকের বিশেষত্ব ও সে সাথে আঞ্চলিক বাণিজ্য - রাজনীতি ইত্যাদিকে অত্যন্ত গুরুত্বের সাথে হিসাবে আনছেন। তারপরও তাঁরা শ্রমিক বিভাজন ও বিশেষায়নের মত বিষয়গুলোর, যেমন প্রতিষ্ঠান, বিধি-বিধান, লেনদেনের খরচকে (Transaction Cost) তেমন একটা গুরুত্ব দেননি। প্রতিষ্ঠানের সামর্থ্য বা লেনদেনের ব্যয় সে দেশের রাজনৈতিক ও অর্থনৈতিক কাঠামোর মধ্যেই নিহিত থাকে। অ্যাডাম স্মিথের “উদার বাজার ব্যবস্থাপনাকে” আমরা পুঁজিবাদের নৈতিক দর্শনের (Moral philosophy of capitalism) ভিত্তি হিসেবে মেনে নিলেও একটা নৈতিক অর্থনৈতিক (Moral economy) ব্যবস্থা কেবল তখনই সফল হতে পারে যখন, অর্থনৈতিক ও রাজনৈতিক ক্ষমতার একটা চমৎকার সংমিশ্রণ ও সন্নিবেশন থাকে। কিন্তু রাষ্ট্রের যাবতীয় ক্ষমতা যদি গুটিকয়েক ব্যক্তির হাতে বা বিশেষ বিশেষ মহলের হাতে কুক্ষিগত হয়ে যায়, তাহলে এই বিশেষ ব্যক্তির তাদের অর্থনৈতিক ও রাজনৈতিক প্রভাব খাটিয়ে দেশের যাবতীয় সম্পদের নিয়ন্ত্রণ নিজেদের হাতে তুলে নেওয়ার চেষ্টা করে। ইহাই রাজনৈতিক ও অর্থনীতির স্বাভাবিক প্রকৃতি ও চরিত্র। এই নীতি অবশ্যই অ্যাডাম স্মিথের উদারনৈতিক বাজার ব্যবস্থাপনা বিরোধী।

বিগত দশকগুলোতে বাংলাদেশের রাজনীতিতে অশুভ, অনৈতিক ও অসাংবিধানিক আচরণ এবং বিভিন্ন সময়ে অযোগ্য অর্থনৈতিক নীতির কারণে সুযোগ এলেই জনগণ একের পর এক, পর্যায়ক্রমে সরকার বদলিয়েছে, অথচ দেশে শাসন ব্যবস্থার কোন পরিবর্তন হয়নি। এমনকি পরিবর্তনের তেমন কোন আভাস এখানো পাওয়া যাচ্ছেনা। কেননা দেশের রাজনৈতিক ক্ষমতা মুষ্টিমেয় কয়েকজন নেতার হাতে কুক্ষিগত হয়ে যাওয়ার ফলে ক্ষমতায় অধিষ্ঠিত হওয়া সরকারগুলো; আইনের শাসন, গণতান্ত্রিক রীতি-নীতির কোন তোয়াক্কা না করে স্বৈরাচারী আদলে দেশ চালিয়েছে, চালাচ্ছে। ফলে একদিকে মানুষ যেমন সংকীর্ণ আবার অন্যদিকে সংশয়ে ভোগছেন যে বারবার সরকার বদলানো সত্ত্বেও কেন তাদের দুর্ভোগ দিন দিন শুধু বেড়েই চলেছে। তাই একদলের কাছ থেকে আরেক দলের হাতে ক্ষমতা হস্তান্তরের চেয়ে এ মুহূর্তে সমাজের নৈতিক দর্শন-লক্ষ্য হওয়া উচিত রাজনীতির আমূল সংস্কারের মাধ্যমে সামাজিক গোষ্ঠীগুলোর মধ্যে ক্ষমতার ভারসাম্য এনে, প্রথমে ‘সামাজিক সমস্যার সমাধান’ করা। সমাজে ক্ষমতার ভারসাম্য বিধানের মাধ্যমে রাজনৈতিক সমস্যার সমাধান একটা বড়, একমাত্র উপায়। সাথে সাথে যদি সমাজে অধিকার ও দায়বদ্ধতার বিষয়টি নিশ্চিত করা যায়, তাহলে অ্যাডাম স্মিথের উদার অর্থনৈতিক দর্শন, ন্যায়ভিত্তিক অর্থনৈতিক সমৃদ্ধির সহায়ক হতে পারে বলে ধারণা করা যায়।

সামাজিক গোষ্ঠীগুলোর মধ্যে ক্ষমতা বন্টন করে দিলে তারা একে অন্যের সাথে দরকষাকষির মাধ্যমে আয়ের দায়িত্বশীল বন্টন ও ন্যায়ভিত্তিক অর্থনৈতিক সমৃদ্ধি অর্জন করে সমাজে ব্যাপক আর্থ-সামাজিক পরিবর্তন আনতে সক্ষম

হবে। ক্ষমতার ভারসাম্যের বিধান করে, অনেক সমাজ প্রয়োজনীয় পরিবর্তন ঘটিয়েছে। নৈতিক চরিত্র বা আচার ব্যবহার সমাজের কোন একক গোষ্ঠীর ব্যাপার নয় - তা হোক সরকার, রাজনৈতিক দল, অথবা ব্যবসায়ী - শিল্প গোষ্ঠী। তাই মানুষ তাঁর চিরাচরিত বৈশিষ্ট্য হিসেবে সুযোগ পেলেই এককভাবে অথবা কোন গোষ্ঠীর সমর্থনে বাজারের ওপর একক আধিপত্য বিস্তারের চেষ্টা করে। যখন রাজনৈতিক ও ক্ষমতা ভারসাম্যের বিধান থাকে তখন কোন একক গোষ্ঠীর পক্ষে তা সম্ভব হয় না। তখন তারা একটি উদারপন্থী প্রজাতান্ত্রিক (গণতান্ত্রিক) শাসন ব্যবস্থা ও বাজার প্রতিষ্ঠার চেষ্টা করে। সাথে সাথে একই কারণে তাঁরা দরকষাকষির মাধ্যমে আপোষরফা করে একটা প্রয়োজনভিত্তিক সামাজিক কাঠামো গঠন করতে বাধ্য হয় যেমন অর্থনৈতিক ব্যবস্থা, আইনী নিশ্চয়তা (আইনের শাসন), দুর্নীতিরোধ, ক্ষমতার ভারসাম্য রাখার স্থায়ী বিধান, মেধার পরিপালন, উদ্যোক্তাদের উদ্যোগে সহায়তা, মানবধিকারের সংরক্ষণ, কোম্পানীর প্রশাসনে সুশাসন, ইত্যাদি। সুষ্ঠু নিয়মনিতির ওপর ভিত্তি করে এগুলি তৈরি হয় বিধায় সমাজের প্রায় সর্ব মহলে তার একটা গ্রহণযোগ্যতাও থাকে। গ্রহণযোগ্যতা থাকলে সেটাকেই 'নৈতিক' বলে ধরে নেয়া হয়।

অর্থনীতি বনাম সামাজিক নৈতিকতা

মূলধন বলতে সবাই বিনিয়োগ বা ব্যবসা-বাণিজ্যের জন্য অর্থের লেনদেনমূলক ধারকর্জকে বোঝেন। বিনিয়োগ প্রসারে আর্থিক মূলধনের সহায়ক হিসেবে সামাজিক মূলধন একটি অতীব জরুরি উপকরণ। বলা যায় আর্থিক মূলধন বিনিয়োগের পূর্বশর্ত। সামাজিক মূলধন উদ্ভাবনী ও উদ্যমভিত্তিক অর্থনৈতিক প্রবৃদ্ধির বুনিন্যাদ রচনা করে। যেসব দেশ দারিদ্র্যের ফাঁদে আটকে আছে ঐ দেশগুলিকে আর্থসামাজিক উন্নয়নের রাস্তা ধরে সামনের দিকে এগিয়ে যেতে হলে প্রথমেই সামাজিক বিশৃঙ্খলার দুষ্টচক্র থেকে যেভাবেই হোক বেরিয়ে আসতে হবে। বাংলাদেশে বর্তমান সামাজিক ও রাজনৈতিক অস্থিতিশীলতার প্রেক্ষাপটে যদি আর্থসামাজিক উন্নয়নের পথে পা বাড়াতে হয় তা হলে অবশ্যই এ বিষয়ে বড় রকমের পদক্ষেপ নিতে হবে। বিশ্বের অন্যান্য দেশের মতো বাংলাদেশেও কায়িক ও যান্ত্রিক — এই উভয়বিধ অর্থনীতি এবং সস্তা শ্রমভিত্তিক উৎপাদনের অর্থনীতি থেকে জ্ঞানভিত্তিক অর্থনীতিতে উত্তরণের জন্য চেষ্টা চলছে। এ কারণে গোটা রাষ্ট্রসত্তার কর্তব্য হলো দেশের সামাজিক অবকাঠামোকে সঠিকভাবে গড়ে তোলা।

ব্যক্তি, পরিবার, পারস্পরিক বিশ্বাস, বিভিন্ন সম্প্রদায় বা গোষ্ঠী (communities), সমাজ প্রতিষ্ঠান ও নানাবিধ ব্যবসা, বাণিজ্যিক ও পেশাদার সংগঠন যা সমাজকে এক সূত্রে বেঁধে রাখে, একতাবদ্ধ করে, সংযোগ সৃষ্টি করে, সেসবের মিশ্রণ ও সামষ্টিক মূল্যবোধ থেকে সামাজিক মূলধন সৃষ্টি হয়। বলাবাহুল্য, সামাজিক মূল্যবোধগুলির সামষ্টিক মূল্য বা সামাজিক মূলধনের পর্যাপ্ততা আর্থিক মূলধন বিনিয়োগের পূর্বশর্ত। তাই অর্থনৈতিক উদ্যোগ ও বিকাশ বা উন্নয়ন সম্পর্কিত সমস্যা সমাধান কেবল অর্থনীতিবিদদের তৈরি মডেলেই নিহিত থাকে — এটা এক মারাত্মক ভুল ধারণা। একটি দেশে উন্নয়নের সুযোগ-সুবিধা ও সম্ভাবনাগুলিকে পরিপূর্ণভাবে সদ্ব্যবহার করতে হলে সে দেশের আর্থসামাজিক, রাজনৈতিক ও সাংস্কৃতিক বিষয়গুলিকে পুরোপুরি হিসেবে আনতে হবে। বস্তুতপক্ষে সামাজিক, রাজনৈতিক ও সাংস্কৃতিক সমস্যাগুলি অর্থনৈতিক উন্নয়নের লক্ষ্য সংস্কার ও পরিবর্তনের যে কোনো উদ্যোগের পথে অত্র রায় হয়ে দাঁড়ায়। সেজন্যই ঐ উদ্যোগগুলির প্রতি সুশীল সমাজ, বিভিন্ন গোষ্ঠী, বিভিন্ন ব্যবসা-বাণিজ্যিক সংগঠনসহ সাধারণ নাগরিকদের সচরাচর মানসিক চিন্তা-চেতনার স্বরূপ সঠিকভাবে নির্ণয় করা অত্যন্ত গুরুত্বপূর্ণ। একই সাথে সরকারকে ব্যবসায়ী সম্প্রদায় ও অন্যান্য রাজনৈতিক ও সামাজিক গোষ্ঠীগুলির সাথে সম্মিলিতভাবে অংশীদারিত্বের মাধ্যমে অবশ্যই একটা জাতীয় ঐকমত্য গড়ে তুলতে হবে। বিশ্বায়নের এ যুগে অত্যন্ত প্রতিযোগিতাপূর্ণ বিশ্ববাজারে সাফল্য লাভ করতে হলে সরকারকে সামাজিক মূলধন বা সামাজিক সম্পদের পুঞ্জীভূত সঞ্চয় (accumulated savings) বাড়ানোর একটা কৌশল অবশ্যই গড়ে তুলতে হবে।

রাষ্ট্রবিজ্ঞানী রবার্ট পুটন্যাম বলেছেন, “সামাজিক গোষ্ঠীগুলির শক্তিশালী নেটওয়ার্ক সাধারণত অনেকভাবেই সামাজিক মূলধন বা সামাজিক সম্পদ বৃদ্ধির অভিন্ন লক্ষ্য অর্জনের প্রয়াসে সহযোগিতার পথ সুগম করে দেয়। এই নেটওয়ার্কগুলি পুনঃপুনঃ সামাজিক কাঠামোর মধ্য থেকেই বিভিন্ন সামাজিক গোষ্ঠীকে সহযোগিতাভিত্তিক উদ্যোগ গ্রহণের সুযোগ সৃষ্টি করে সমাজের কার্যভূমিকা সম্পাদনকারীদের নানা কর্মতৎপরতার মধ্যে যোগসূত্র বৃদ্ধি করে। এসব কার্যকলাপের অত্র ভূক্ত রয়েছে পারস্পরিক প্রয়োজনে ইতিবাচক সাড়া দেওয়ার প্রমিত আদর্শ, বর্ধিত তথ্যপ্রবাহ, আস্থাযোগ্যতা বৃদ্ধি, সামাজিক সহযোগিতা ও সামাজিকতার উন্নয়নে উৎসাহ এবং প্রেরণা ইত্যাদি। এগুলির মধ্য দিয়ে সমাজের বিভিন্ন গোষ্ঠীর মাঝে একটি অভিন্ন সমঝোতার কাঠামো প্রতিষ্ঠিত হলে পারস্পরিক সামাজিক সহযোগিতার

পথ সুগম হয়, সে সহযোগিতা সমাজকে স্থিতিশীল রাখে ও সামাজিক মূলধন বাড়ায়। অর্থনৈতিক উন্নয়নের জন্য তাই শক্তিশালী ও সক্রিয় সামাজিক নেটওয়ার্কগুলির উপস্থিতি ও কার্যকারিতা অপরিহার্য।

সামাজিক গোষ্ঠীগুলির পারস্পরিক সহযোগিতা ও সক্রিয় তৎপরতা, অর্থনৈতিক তৎপরতার উৎকর্ষগত গুণমানকে বিশেষভাবে উন্নত করে। উন্নত সমাজগোষ্ঠী পারস্পরিক সহযোগিতার মাধ্যমে যে সামাজিক মূল্যবোধ সৃষ্টি করে সেটাই সামাজিক মূলধন, যাকে এক কথায় আর্থসামাজিক উন্নয়নের চাবিকাঠি বলা যেতে পারে। সামাজিক মূলধন বৃদ্ধি, অর্থনৈতিক বিনিয়োগ বৃদ্ধির পূর্বশর্ত।

সামাজিক মূলধন ও অর্থনৈতিক উৎপাদনশীলতা

তাছাড়া ‘সামাজিক মূলধন’ বলতে সমাজ গোষ্ঠীগুলির পারস্পরিক সহযোগিতার প্রকৃতি ও পরিসরকেও বোঝানো হয়ে থাকে। সামাজিক মূলধন এ ধরনের গোষ্ঠীগুলির পারস্পরিক সম্পর্ক কতটা নিবিড় তার পরিমাপও। পারস্পরিক সহযোগিতা ও নিবিড় সম্পর্ক সমাজ অবকাঠামো ও সমাজ গোষ্ঠীগুলিকে ক্রমান্বয়ে টেকসই ও শক্তিশালী করে তোলে। আর টেকসই সমাজ অবকাঠামো অবলম্বন করে শক্তিশালী সমাজ গোষ্ঠীগুলি দ্রুতগতিতে সামাজিক মূলধন সৃষ্টি করে। তাই সামাজিক মূলধন বলতে সমাজ প্রতিষ্ঠানগুলির চলতি সহযোগিতাসহ অতীতের সকল সফল প্রয়াসের মোট রেকর্ড ও যোগফল বোঝায়। ভৌত অবকাঠামোর মতো সমাজ অবকাঠামো ও সামাজিক মূলধন অর্থনৈতিক উৎপাদনশীলতা বৃদ্ধি করতে সক্ষম। এ সবার যথেষ্ট ইতিবাচক বহির্দেশীয় সম্ভাবনাও আছে। কেননা সামাজিক মূলধন নিশ্চিত উৎপাদনশীলতা বৃদ্ধির প্রয়োজনীয় ও পূর্ণাঙ্গ উপকরণ।

এমন কিছু কিছু বিষয় ও উপাদান আছে যেগুলি পরিমাপ করা যায় না অথচ এসব উপাদান ও বিষয় অর্থনৈতিক প্রবৃদ্ধিতে অত্যন্ত গুরুত্বপূর্ণ প্রভাব রাখে — এ কথা অর্থনীতিবিদগণ স্বীকার করেন। এভাবে বলা যায়, সমাজ প্রতিষ্ঠানগুলির পারস্পরিক সহযোগিতায় সৃষ্ট সামাজিক মূল্যবোধের ক্রমপুঞ্জিত সঞ্চয় সমাজের ধারাবিন্যাস ও পুনর্বিন্যাসে সহায়ক, আর তাই সেই সঞ্চয়ই সামাজিক মূলধন। রবার্ট পুটন্যাম আরও বলেছেন “জনসমাজের সুযোগ-সুবিধা সমৃদ্ধ সংঘজীবন দেশে শাসনকে সহজ করে ও তার ফলে অধিকতর কার্যকর গণতান্ত্রিক সরকার ব্যবস্থা প্রতিষ্ঠিত হয়”।

মানুষ স্বভাবগতভাবে সামাজিক জীব। মানুষের নিজ মৌলিক তাড়না ও সহজাত প্রবৃত্তিবশে কিছু নৈতিক মূল্যবোধ গড়ে তোলে। আর সেই মূল্যবোধের কারণেই তারা সমাজবদ্ধ হয়। সততা, অস্বীকার বা চুক্তিরক্ষা ইত্যাদি নৈতিক মূল্যবোধের মতো সামাজিক সংগুণগুলি কেবল নৈতিক মূল্যের কারণেই সমাজে প্রয়োজন বললে ভুল হবে; আসলে এগুলির বোধগম্য বস্তুমূল্যও আছে। ভৌত সম্পদ; যেমন জমি ও মেশিনপত্র, মানব সম্পদ; যেমন দক্ষতা ও জ্ঞান এবং সামাজিক সম্পদ; যেমন বিশ্বস্ততা, সামাজিকতা, সংঘ জীবন ও পারস্পরিক সহযোগিতা উৎপাদন বৃদ্ধি করে ও জাতির জন্য সম্পদ সৃষ্টি করে। আর সে কারণেই জাতীয় পর্যায়ে সামাজিক সম্পদের অর্থনৈতিক মূল্য আছে। সামাজিক মূলধনের বিপরীতমুখী প্রবৃদ্ধি মানে আর্থিক বিনিয়োগে ঘাটতি ও নিঃসুখী উৎপাদন। বাংলাদেশে বর্তমান বিনিয়োগ পরিস্থিতি পর্যালোচনা করলে, এটা আর ব্যাখ্যা-বিশ্লেষণের প্রয়োজন নেই। সামাজিক মূলধন তাই যে কোনো ধরনের অর্থনৈতিক প্রয়াসের পূর্বশর্ত।

সামাজিক মূলধনের উপকারিতা অর্থনৈতিক পরিমণ্ডলের বাইরেও সম্প্রসারিত। একটি সুস্থ, সুশীল সমাজ গড়ায় সামাজিক মূলধন অত্যন্ত গুরুত্বপূর্ণ বিষয়। টেকসই সামাজিক মূলধন সমাজ উন্নয়নে সমাজ গোষ্ঠীগুলিকে শক্তিশালী ভূমিকা রাখতে সহায়তা করে। অর্থাৎ যেসব গোষ্ঠী, সমিতি-সংঘ, ব্যক্তি পরিবার ও রাষ্ট্রের মধ্যে সম্পর্ক গড়ে তোলে, বজায় রাখে ও তত্ত্বাবধান করে সেসব প্রতিষ্ঠান গড়ে তোলা ও শক্তিশালী করা অতীব প্রয়োজনীয়। কেননা সুশীল সমাজ প্রতিষ্ঠানগুলির প্রবল প্রাণশক্তি দেশের সকল গণতান্ত্রিক প্রতিষ্ঠান ও দেশের প্রাণবন্ত অর্থনীতির গতি বৃদ্ধি করা ও স্থিতিশীলতা বজায় রাখার জন্য অত্যন্ত জরুরি। অন্যদিকে যোহেতু এগুলি আর্থসামাজিক উন্নয়নের মূল উপাদান, সেহেতু ভিন্ন ভিন্ন পরিবেশবেষ্টিত একটি বিচিত্র সমাজে বিভিন্ন গোষ্ঠীকে তাদের স্বার্থ রক্ষায় একজোট হতে সহায়তা করে। সমাজের বিভিন্ন স্বার্থের ধারক ও বাহকের কার্যকর ভূমিকায় অবতীর্ণ গোষ্ঠীগুলি যথাযথভাবে ঐক্যবদ্ধ হতে না পারলে রাষ্ট্রযন্ত্রের প্রবল শক্তি জনসমাজ ও তাদের মতামতকে উপেক্ষা করতে পারে। সেহেতু আর্থসামাজিক উন্নয়নে শক্তিশালী সুশীল সমাজ অপরিহার্য, আর সামাজিক মূলধন শক্তিশালী সুশীল সমাজ গঠনের অন্যতম উপকরণ। সামাজিক মূলধন ছাড়া যেমন আর্থিক বিনিয়োগ হবেনা, তেমনি সুশীল সমাজ হতে পারে না, সুশীল সমাজ ছাড়া গণতন্ত্রও সফল হতে পারে না।

সামাজিক মূলধনের পরিমাপ করা সহজসাধ্য বিষয় নয়। এফবিসিসিআই বা অর্থনীতি সমিতির কার্যকর ভূমিকার মূল্যায়ন বা অর্থনৈতিক উন্নয়নে এ সংগঠনগুলির অবদান কিভাবে পরিমাপ করবো? তবে সামাজিক মূলধনের ইতিবাচক মূল্য পরিমাপের তুলনায় তার নেতিবাচক মূল্য পরিমাপের বিষয়টি বরং সহজ। মূল্যায়ন আরও সহজতর হতে পারে যখন সামাজিক মূলধনের অনুপস্থিতির কারণে সামাজিক কার্যক্রমে অস্বাভাবিকতা বা অকার্যকারিতার মূল্যায়ন করা হয়। সামাজিক অবিশ্বাস, অপরাধের হার, হত্যাকাণ্ড, সহিংসতা, চুরি, পারিবারিক বিপর্যয়, কিশোর অপরাধপ্রবণতা, পরিবারে একে অন্যের প্রতি অশ্রদ্ধাবোধ, মাদকের অপব্যবহার, খুন, গুম, বিচারহীনতা, এ্যাসিড নিক্ষেপ, ধর্ষণ, ঝগড়াবিবাদের ফলে সমাজে মামলা-মোকদ্দমার সংখ্যা, মিথ্যা মামলা, হয়রানিমূলক মামলা, আত্মহত্যা, দুর্নীতি, করফাঁকি, ট্রাফিকবিধি লঙ্ঘন, বিচারে বিলম্ব, আইন অমান্য করার প্রবণতা, নিজ হাতে আইন তুলে নেওয়া, পুলিশের নৃশংসতা ও নিষ্ঠুরতা, মন্দ শাসন ও সাংবিধানিক সঙ্কট এগুলির উল্লিখিতভাবে একক ও সামষ্টিকভাবে মূল্যায়ন করা হয়। এগুলি যতোই বাড়বে ততোই সমাজের মূল্যবোধের অবক্ষয় ঘটতে থাকবে, সাথে সাথে সামাজিক মূলধনের ঘাটতি দেখা দেবে। সামাজিক মূলধনের অনুপস্থিতি সুনিশ্চিতভাবেই সমাজ কাঠামোকে অস্বাভাবিক ও অকার্যকর করে তোলে। অন্যদিকে সামাজিক মূলধনের পর্যাপ্ততায় সমাজে শৃঙ্খলা ফিরে আসে ও সামাজিক স্থিতিশীলতা বৃদ্ধি পায়। বাংলাদেশে বর্তমান সমাজ ব্যবস্থার কার্যক্রম, বিশৃঙ্খলা, অস্থিতিশীলতা, দুর্নীতি, স্বজনপ্রীতি, অপরাধপ্রবণতা, ইত্যাদির মূল্যায়ন করলে সহজেই বোঝা যায় যে সমাজে একটা অস্বাভাবিকতা বিরাজ করছে। আর যখন এ রকম পরিস্থিতি দীর্ঘদিন বিরাজ করে তখন অর্থনৈতিক উদ্যোগ-উদ্যম ব্যর্থ হয়। আর্থসামাজিক ও রাজনৈতিক অবস্থার আরও অনিবার্য অবনতি ঘটে এবং সমাজ ধীরে ধীরে শাসনের অনুপযুক্ত হয়ে পড়ে। এসবের উৎস দেশের রাজনীতিতে নিহিত। উপরোক্ত বিষয়গুলো সচরাচর সামাজিক নৈতিকতার সাথে সম্পর্কিত। সে কারণেই সুশীল সমাজ, সমাজ প্রতিষ্ঠান, মানুষের নৈতিক মূল্যবোধ ইত্যাদির সমন্বয়ে সৃষ্ট “সামাজিক মূলধনের” প্রয়োজনীয়তাকে খাটো করে দেখার কোনো অবকাশ নেই, বরং সামাজিক মূলধন হলো আর্থিক মূলধন বিনিয়োগের পূর্বশর্ত।

অর্থনীতি ও নৈতিকতা — মুনাফা

মানুষকে যেমন বেঁচে থাকার জন্য নিঃশ্বাস নিতেই হয়, ব্যবসায়ীদেরকেও টিকে থাকার জন্যই মুনাফা করতে হয়। ব্যবসায়ী প্রতিষ্ঠান অথবা কোম্পানিগুলির কাজকর্ম নৈতিকও নয়, অনৈতিকও নয়। তবে যারা এ সব ব্যবসা প্রতিষ্ঠানের মালিক বা পরিচালনা করেন তাদের নৈতিকতা-অনৈতিকতার প্রশ্ন অবশ্যই আছে। তাছাড়া মুনাফা এক দিকে যেমন সমাজের দক্ষতার এক অপরিহার্য মৌলিক উপাদান - যে দক্ষতা অপচয় পরিহারের দক্ষতা, অন্যদিকে আবার দক্ষতা হচ্ছে উপযুক্ত প্রযুক্তি কাজে লাগিয়ে উৎপাদনযোগ্য পণ্য ও সেবাপণ্যের সঠিক পরিমাণ উৎপাদন নির্ধারণের দক্ষতা। মুনাফা আবার বস্ত্র বা জড়বাদের সাথে সম্পর্কিত যা আধ্যাত্মিকতার তথা জীবনের গভীরতম অর্থ ও তাৎপর্যের বিপরীত। নৈতিকতা সম্পর্কে বেশিরভাগ পাশ্চাত্য ধারণায় মুনাফা ভালো জিনিস। কিন্তু মুনাফার লিন্সা ভালো নয়। পৃথিবীর তিন প্রধান ধর্মের তিনটিতেই সুদে অর্থ ধার দেওয়াকে দুটি কারণে নিষিদ্ধ করা হয়। একেবারে গোড়ার দিকে এ সব ধর্ম সুদে টাকা ধার দেওয়া ব্যবসাকে সম্পূর্ণ নিষিদ্ধ করেছে। সুদ নিষিদ্ধ করার দুটি কারণের একটি হলো; “কোনো কাজ না করে তথা কোনো উৎপাদন না করেই টাকাকে আরও বেশি টাকায় পরিণত করার কাজ অনৈতিক”; দ্বিতীয় বক্তব্য : এ কাজটি হলো একজন ব্যক্তি কর্তৃক তার সহযোগী আরেকজনের কাছ থেকে ঘণ্য ও লজ্জাস্কর মুনাফা করা। ইহুদি, খ্রিষ্টান ও ইসলাম এ তিনটি ধর্মই সুদ সম্পর্কে একই ধরনের ব্যবস্থাপত্র দিয়েছে। তবে যেহেতু অর্থের লেনদেনমূলক ধারকর্জ ছাড়া বিনিয়োগ ও অর্থনৈতিক ব্যবস্থা ভালো কাজ করতে অক্ষম, খ্রিষ্টান দেশগুলি সেহেতু সুদের বদলে আরেকটি নাম মাঝামাঝি ব্যবস্থা হিসেবে চালু করেছে। এর নাম তারা দিয়েছে ‘ইন্টারেস্ট’। আর মুসলমানরা একই ধরনের ব্যবস্থা দিয়েছে যাকে “মুরাদাবা” নামে অভিহিত করা হয়ে থাকে। তারা এটাকে কর্জদাতা ও কর্জগ্রহণকারীর মধ্যকার ব্যাপার হিসেবে ধরে থাকে।

মুনাফা — নিয়ামক বনাম নৈতিকতা

চিরায়ত উদারনৈতিক সমাজের বিরুদ্ধে যে সব যুক্তি-তর্ক দাঁড় করানো হয়, সে সবের অন্যতম হচ্ছে- ঐ সমাজের অর্থনীতি মুনাফা পরিচালিত। মুনাফা মানেই লিঙ্গা, তাই মুনাফা অনৈতিক। মুনাফার সঙ্গে লোভের সম্পর্ক চিরাচরিত। তাই ব্যবসায়ীরা দেশের জনগনের সামষ্টিক স্বার্থকে বড় করে দেখে না। তারা কেবল তাদের স্বর্গীয় স্বার্থকেই বড় করে দেখে, যেমন তারা সমাজের কল্যাণসাধন বা পরিবেশের মত বিষয়গুলোকে নিয়ে মাথা ঘামায় না। পক্ষান্তরে অবাধ উদ্যোগভিত্তিক সমাজে (Free enterprise Society) মুনাফাই হলো ঐ সমাজের চালিকা শক্তি। এই সমাজে বাজার মানের নিরিখে যদি কেউ কোন একটা ব্যবসাতে খুবই বেশি মুনাফা করতে থাকে তাহলে অন্য আর একজন একই ধরনের পাল্টা ব্যবসা গড়ে তোলে - যাকে বলা যায় ‘চিরায়ত উদারনৈতিক মূলনীতিভিত্তিক তৎপরতা’। এ ভাবে ব্যবসায়ের নতুন যে প্রতিযোগী এলেন তিনি একই পণ্য কম দামে বা আরও উন্নতমানের পণ্য একই দামে বাজারে ছাড়বেন অথবা পণ্যের মান ও দামের একটা সমন্বয় করে তা বাজারে তুলবেন যার ফলে মূল পণ্য উৎপাদক যিনি বর্তমানে বেশী মুনাফা করছেন তাঁর পণ্যের দাম কমাতে বাধ্য হবেন। এতে মুনাফাও কমে যাবে। এ ভাবে প্রয়োজনীয় কাটছাঁটের পর যে মুনাফা দাঁড়াবে তা হবে বিনিয়োগিত মূলধন থেকে বাজারভিত্তিক আয়। একইভাবে শ্রমের জন্য যে মজুরি দেওয়া হয় সেটি হবে শ্রম বাবদ বাজারভিত্তিক আয়। মুনাফার জন্য সন্ধানী তৎপরতার কারণেই উৎপাদনমূলক সম্পদ, কাঁচামাল ও অন্যান্য উপকরণ ঐ সব খাতে প্রবাহিত হয় যে সব খাতে পণ্য বা পরিষেবার চাহিদা বেশী অথচ সরবরাহ কম। আবার যদি কোন খাতে চাহিদার থেকে সরবরাহ বেড়ে যায়, তাহলে এ সব সম্পদ যেখানে চাহিদা বেশী সে খাতের দিকে প্রবাহিত হবে। কেননা চাহিদা বেশী, সরবরাহ কম - মানেই হলো মুনাফা বেশী। এমনি ভাবে মুনাফা এক নিয়ামক ভূমিকায় অবতীর্ণ হয়। যার ফলে সঠিক পণ্য ও পরিষেবা, সঠিক পরিমাণ ও সঠিক মূল্যে উৎপাদিত হয় ও যুক্তিসঙ্গত মূল্যে এ সব পণ্যের চাহিদা মেটানো হয়।

আমার দৃঢ় বিশ্বাস যাঁরা নীতিগতভাবে মুনাফার বিরোধী তাঁরা মুনাফার প্রেরণা বা অভিপ্রায়কে (motive) অতিরঞ্জিত করে তুলে ধরেন। বহু উদ্যোক্তা যেমন মুনাফা দ্বারা অনুপ্রাণিত হন তেমনি পেশাদারি সঙ্ঘটির কারণেও প্রেরণা বোধ করেন। যদিও অস্তিত্ব রক্ষার জন্য মুনাফা অনস্বীকার্য আবশ্যিকতা। অবশ্য, এর বিরোধীরা (intervastionist) সাধারণত অহেতুকভাবে জোর করে দাবি করেন যে মুনাফা লোভ, অবিবেচনা, পরিবেশ ধ্বংস ও অন্যান্য অপ্রীতিকর সমস্যার সাথে সরাসরি সম্পর্কিত। অন্যদিকে ক্ল্যাসিক্যাল উদারনৈতিকতাবাদীরা যে অর্থনৈতিক তত্ত্বে বিশ্বাস করেন সেটা হলো “মুনাফা মাত্র নিয়ামকের” কাজ করে। তাই মুনাফা নিয়ামক হিসাবে নিয়ন্ত্রণ করে; কোন বাজারে কোন পণ্য উৎপাদিত হবে, কে হবে ভোক্তা, কত হবে পণ্যের মূল্য ও উৎপাদনের সাথে সম্পর্কিত আয় এবং কে কতটুকু পাবে। এ সব কার্যকলাপের যে কোনোটি যেমন লোভ, লোলুপ ও অবিবেচনার সাথে সম্পর্কিত হতে পারে, তেমনি আবার এই সব তৎপরতার সাথে মহানুভবতা, দয়াদাক্ষিণ্য, ও পেশাদারি সঙ্ঘটিও সম্পর্কিত। সমাজতন্ত্র বহুকাল ধরে ‘আদর্শ সমাজ ব্যবস্থা’ হিসেবে বিবেচিত ও প্রশংসিত হয়ে এসেছে। এ ব্যবস্থার জোরগলায় প্রশংসা করে তারাই যারা মুনাফার বিরোধী। কিন্তু সেই কথিত সমাজতন্ত্রীদেরকেই পরবর্তীকালে দেখা গেছে তাঁরা চরম লোভ, অসহিষ্ণুতা, হিংসাত্মক রাজনীতি ও নিষ্ঠুরতার প্রতিমূর্তি হয়ে উঠেছেন।

আর্থ-সামাজিক রূপান্তর ও নৈতিকতা

অর্থনীতির বিশ্বায়নের আওতায় সবাই প্রত্যাশা করে যে ব্যবসায়ীদের মাঝে নূতন করে একটা নৈতিকতাবোধের সৃষ্টি হবে। ব্যবসায়ী সম্প্রদায়ও তাই চায়। কিন্তু দুর্ভাগ্যজনক হলেও সত্যি যে, এই নৈতিকতার পরিমাপ ও পরিধি কি হবে তা আজও পরিমাপ করা সম্ভব হয়নি। স্থান-কাল পরিক্রমায় অন্যান্য পরিবর্তনের (রাজনৈতিক ও সামাজিক) সাথে অর্থনৈতিক নৈতিকতাও বদলায়। যেমন আজকের সমাজে দাসত্ব, দস্যুতা, হত্যা-খুন, এমনকি শিক্ষা প্রতিষ্ঠানে ছাত্রদেরকে বেত্রাঘাত ও নির্যাতন অনৈতিক বিবেচিত হচ্ছে, অথচ একদা সেগুলি নৈতিক পর্যায়ে গ্রহণযোগ্য ছিল। এমনকি কিছুকাল আগে পর্যন্ত খুন ও হত্যা শুধুমাত্র আত্মীয়-স্বজনের বিরুদ্ধে ঐ বিশেষ ব্যক্তির কৃত অপরাধ হিসাবে বিবেচিত হতো। কিন্তু এখন খুনকে রাষ্ট্রের বিরুদ্ধে সংঘটিত জঘন্যতম অপরাধ হিসেবে গণ্য করা হয়। কিছুদিন আগেও আজকের উন্নত ও গণতান্ত্রিক দেশগুলোতে মহিলাদের ভোটাধিকার ছিলনা, কিন্তু এখন মহিলা-পুরুষের এ বৈষম্য নৈতিকতার দিক থেকে গ্রহণযোগ্য নয়। তবে কোনো পরিমাণের সামাজিক নৈতিকতাই মানুষের আয়ে সমতা আনবেনা, ধনী ও দরিদ্রের ব্যবধান কিংবা দারিদ্র্য কমাতে না। ধনী-দরিদ্রের ব্যবধান ও দারিদ্র্য হ্রাসের মূল চাবিকাঠি মূলত ন্যায্যভিত্তিক সমাজে অধিকতর উৎপাদনের মাঝে নিহিত। অর্থনৈতিক তত্ত্ব আমাদের শিখিয়েছে; উদারনৈতিক সমাজ ব্যবস্থা অর্থনীতির সর্বোচ্চ প্রবৃদ্ধি নিশ্চিত করে। অস্তিত্বশীল, প্রাপ্য ও ব্যবহারযোগ্য সম্পদ ও প্রযুক্তির সর্বোচ্চ

ব্যবহারে প্রতিযোগিতামূলক মূল্যে সর্বাধিক পণ্য ও সেবাপণ্য উৎপাদন সম্ভব। দক্ষ, সহানুভূতিশীল ও ন্যায্যভিত্তিক সমাজে সম্পদ ও প্রযুক্তি যা-ই থাকুক, সেই সমাজে উৎপাদন বৃদ্ধি পায় ও তাত্ত্বিক দিক থেকে সেই সমাজে দরিদ্র থাকলেও এত বৈষম্য থাকার কথা নয়।

ক্ষমতার কেন্দ্রায়ন — সম্পদ ও আয় বিলি-বন্টনের নৈতিকতা

অনেকেই সহজে ধারণা করেন, দারিদ্র্যের কারণ গরিবদের নিম্নমানের বুদ্ধিমত্তা। অবশ্য আমি বাংলাদেশে যা লক্ষ্য করেছি তাতে বলতে পারি বহু গরিব লোকেরই বুদ্ধিমত্তা (I.Q.) আমাদের মতো মধ্যবিত্ত মানুষের চেয়ে কোনো অংশেই কম নয়। তারা উদ্যোগ গ্রহণেরও সামর্থ্য রাখে। তা ছাড়াও অর্থনীতির ইতিহাস থেকে দেখা যায়, একটি উদারনৈতিক সমাজ ব্যবস্থায়, আয় ও সম্পদের সমবন্টন না হলেও ক্ষমতার ভারসাম্য সমাজকে সুখম বন্টন ব্যবস্থার কাছাকাছি এগিয়ে নিয়ে যায়। আমরা কথাটাকে এ ভাবে বলতে পারি যে স্বতঃপ্রণোদিতভাবে দারিদ্র্য দূর করার লক্ষ্যে ইতিবাচক উদ্যোগে অংশ নেওয়ার মতো বুদ্ধিমত্তা, তীক্ষ্ণ দূরদর্শিতা ও সহযোগিতাবোধ গরিব লোকজনসহ অভাগা ব্যক্তিদের মাঝেও আছে। তবে শর্ত হলো, তাদেরকেই উদ্যোগ গ্রহণে বাধা দিলে তা হবেনা বরং সহায়তা করতে হবে।

আধুনিক পরিমাপমূলক সমীক্ষা ও জরিপের কল্যাণে আমরা সুনিশ্চিত জানি, অধিকতর উন্নত দেশগুলির তুলনায় কম উন্নত ও কম গণতান্ত্রিক সমাজে সম্পদ ও আয়ের বিলিবন্টনে বৈষম্য অনেক বেশী। গণতান্ত্রিক সমাজে অর্থনৈতিক উন্নয়নের সাথে আয়ের বিলিবন্টনের সমতা আসে। এশিয়া, আফ্রিকা বা লাতিন আমেরিকার হোক বা মধ্যযুগের ইউরোপের মতো আগেকার দিনের কোনো কম উন্নত দেশ হোক -- এই সব দেশের কতকগুলি বৈশিষ্ট্য অভিন্ন বলে লক্ষ্য করা যায়। অনুন্নয়ন ও দারিদ্র্যের প্রধান কারণ হলো শাসক ও শাসক দলের হাতে অতিরিক্ত ক্ষমতার কেন্দ্রায়ন। অতিরিক্ত ক্ষমতার অধিকারীরা রাজনৈতিক ক্ষমতা করায়ত্ত করার সাথে সাথে অতিরিক্ত সম্পদও তাদের হাতে কুক্ষিগত করতে উঠে পড়ে লেগে যায়। তাতে জনসাধারণ ও অর্থনীতিকে সম্ভাব্য সর্বোচ্চ সামর্থ্যে কাজ করতে দেয়া হয় না। কেন্দ্রীভূত ক্ষমতা সমাজে সম্পদ সৃষ্টি ও আয়ের সুখম বিলি বন্টনের পথে পর্বতসমান অত্ত রায় হয়ে দাঁড়ায়। তাতে যা হবার তা-ই হয়। পণ্য ও সেবা পণ্যের সর্বোত্তম উৎপাদন হতে পারে না। বাজার শক্তিগুলি তার আপন নিয়মে চলার জন্য যে সব বিধিবিধান দরকার সেগুলি গড়ে ওঠে না বা অতিরিক্ত বিধিবিধানের জটাজুটে আটকে পড়ে বাজার তৎপরতার গতিরোধ ঘটে, সমাজের বিভিন্ন গোষ্ঠীর মধ্যে ক্ষমতার বিলিবন্টন হয় না, সেই সুযোগে অপ্রতিহত গতিতে সমাজের রক্তে রক্তে দুর্নীতি বিস্তারলাভ করে। ক্ষমতা এক হাতে বা মুষ্টিমেয় গুটিকয় হাতে পুঞ্জীভূত হলে দুর্নীতি তার স্বাভাবিক নিয়মে ক্ষমতাবানদেরকেই লাভবান করে কেননা তাদের অবস্থান সুবিধাভোগীর অবস্থান।

দুর্নীতি, রাজনীতি ও নৈতিকতা

ক্ষমতার বিকেন্দ্রায়ন বা বিলি বন্টনের প্রক্রিয়ায় যদি কোন প্রতিযোগী শক্তিশালী বিরোধী রাজনৈতিক দল বা পরিবার গড়ে ওঠে সে অবস্থায় ক্ষমতাসীন ও বিরোধী - উভয় পক্ষই এক অন্যের দুর্নীতি কমানোর প্রয়াসে পরস্পরকে নিয়ন্ত্রণের চেষ্টা করে। এটা হলো তত্ত্ব। তবে বাংলাদেশে নিজ পক্ষের দুর্নীতিকে দমন করার পরিবর্তে নব উদ্যমে দুর্নীতিবাজদের সহায়তা করে। এ ভাবে দুর্নীতি দমন আইনগুলি, অপরাধ মাত্রায় হলেও, ক্ষমতাসীনরা বেছে বেছে শুধুমাত্র তাঁদের বিরোধীদের বিরুদ্ধে প্রয়োগ করে, বিরোধীদের কঠোর ও দমন করে রাখার হাতিয়ার হিসেবে। যদিও ক্ষমতাসীনদের অপরাধ বিরোধী দলীয় ব্যক্তিদের চেয়ে কোনো অংশে কম নয়, বরং বেশী। আর বিরোধীপক্ষ শুধুমাত্র ক্ষমতাসীনদের বিরোধীতা করে নিজেদের দুর্নীতির দায় থেকে রেহাই পাওয়ার জন্য ও জনগনকে বিভ্রান্ত করে পুনরায় ক্ষমতায় ফিরে আসার জন্য। বাংলাদেশের মতো কার্যত দ্বি-দলীয় রাজনৈতিক ব্যবস্থায় এ ধরনের হাতিয়ার কাজে লাগানোর সুযোগ সবচেয়ে বেশী কেননা, উভয় পক্ষই কার্যত একই ধরনের কর্মসূচির প্ল্যাটফর্মে নির্বাচনী লড়াইয়ে অবতীর্ণ হয়। উভয় দলেই রয়েছে অত্যন্ত বেশি মাত্রায় রাজনৈতিক অপরাধীদের চক্র, আর এ অপরাধ চক্রের বিজুতি তৃণমূল পর্যায় অবধি বিস্তৃত। দুর্নীতির মূল উৎপাতনের সত্যিকারের কোনো অভিপ্রায় কোন সময়ই, কোন পক্ষ থেকে জোরালোভাবে দেখা যায়নি।

বিশ্বসমাজ দুর্নীতিকে একটা দৃষ্টক্ষত হিসেবে শনাক্ত করেছে। গণতন্ত্র ও উন্নয়নের পথে দুর্নীতি যেমন ক্ষতিকর তেমনি সমাজ কল্যান ও অর্থনৈতিক প্রবৃদ্ধির পথে দুর্নীতি হলো এককভাবে সবচেয়ে বিপদজনক বাধা। বিশ্বাসভঙ্গ, সরকারি

পর্যায় প্রতারণা, ব্যক্তিস্বার্থকে জাতীয় স্বার্থের উর্ধ্ব স্থান দেয়া, উচ্চপদে অধিষ্ঠিত ব্যক্তিবর্গের স্বজনপ্রীতি। সত্য ঘটনা গোপন, অবৈধ সুবিধা লাভের জন্য যোগসাজস, বিলম্বে সিদ্ধান্ত গ্রহণ, ক্ষমতার একতরফা অনুশীলন, পরিকল্পিতভাবে জনগণকে বিভ্রান্ত করা, এসবই দুর্নীতির অঙ্গভুক্ত। দুর্নীতি সম্পদের অবৈধ সঞ্চয় ঘটায়, সংগঠিত ও সংঘবদ্ধ অপরাধের প্রসার ঘটায়, আইনের বিকৃতি ঘটায়। সমাজে প্রতিযোগিতার প্রবণতা ক্ষুণ্ণ করে, সম্পদের অসম ও বিসম বন্টন ঘটায়, কলোবাজার অর্থনীতির প্রসার ঘটায়, কুশাসন প্রতিষ্ঠা করে, সম্পদ পাচার বৃদ্ধি করে, প্রবৃদ্ধি ও সংস্কারে প্রতিবন্ধকতা সৃষ্টি করে, রাজনৈতিক সংঘাত ও অস্থিতিশীলতা বৃদ্ধি করে, রাজনৈতিক ও সামাজিক মূল্যবোধের অবক্ষয় ঘটায়। অবৈধ টাকার মালিকরা হয়ে ওঠে প্রতিনিধিত্বশীল কর্তৃপক্ষের চেয়েও বেশি গুরুত্ব ও ওজনদার। যে কোন সমাজে দুর্নীতির উৎস হলো অনৈতিক রাজনীতি ও সামাজিক অবক্ষয়।

নৈতিকতার পূর্বশর্ত — রাজনৈতিক ক্ষমতার ভারসাম্য বিধান

পরিতাপের বিষয় হলেও কথাটা সত্যি, “ আরেকটি শক্তি না থামিয়ে দেওয়া পর্যন্ত শক্তি বা ক্ষমতার সম্প্রসারণ ও অপব্যবহার চলতেই থাকে।” সামন্ত প্রভু, অপরাধী, গডফাদার, একনায়ক, গণতান্ত্রিকভাবে নির্বাচিত সরকার বা স্থানীয় সরকার যে বা যারা ক্ষমতাপ্রার্থী, নির্বিশেষে সকলের ক্ষেত্রেই এ নিয়ম প্রযোজ্য। তাই সমাজের পরিপূর্ণ অর্থনৈতিক সম্ভাবনাকে কাজে লাগিয়ে উৎপাদন বৃদ্ধি করে সুখম বন্টনের মাধ্যমে আয়ের বৈষম্য এবং ধনী ও গরিবের ব্যবধান কমাতে হলে অর্থনীতিবিদ, ব্যবসায়ী, আইন বিশারদ, সমাজ কর্মী, বেসরকারী উন্নয়ন সংস্থা, ট্রেড ইউনিয়ন কর্মী তথা সুশীল সমাজের সবাইকে অবশ্যই চিরায়ত উদারনৈতিকতার দর্শনকে সামনে রেখে এক সাথে হাতে হাত মিলিয়ে কাজ করতে হবে। রাজনৈতিক সংস্কারের মাধ্যমে রাজনৈতিক ও সামাজিক গোষ্ঠীগুলির মধ্যে কেন্দ্রীভূত ক্ষমতাকে ভাগাভাগি করে দিয়ে সামাজিক উত্তেজনা প্রশমিত করে আমাদের উৎপাদন প্রক্রিয়া ও অর্থনৈতিক প্রবৃদ্ধির সকল বাধাবিপত্তি সরাতে হবে। তা না হলে উদ্যোক্তা, সম্পদ, প্রযুক্তি যাই থাকুক না কেন, এগুলোর সর্বোচ্চ ব্যবহার নিশ্চিত করা যাবে না। দেশে টেকসই প্রবৃদ্ধি হবে না। সম্পদ ও আয় কোনটাই বাড়বে না। তবে ধনী-দরিদ্রের বৈষম্য দিন দিন বেড়ে যাবে।

মানবীয় জীবন-জীবিকার ক্রম-উত্তরণ ও অর্থনৈতিক তৎপরতার আবির্ভাব — প্রাচীনকাল

কবে, কখন, কিভাবে বিভিন্ন জনসমাজ ও দেশে সম্পদ ও আয়ের বৈষম্য শুরু হয়েছে কিংবা বিভিন্ন জনগোষ্ঠীর আয়ের বিলি-বন্টনে অসমতা শুরু হয় তা সম্ভবত কেউ সঠিক বলতে পারবে না। প্রাচীন মিসরীয় ও ভূমধ্য উপসাগরীয় রোমান জনসমাজের আয় ও বিত্ত, আফ্রিকীয় ও এশীয় (পারস্য ব্যতীত) জনসমাজগুলির চেয়ে বেশি হওয়ার সম্ভাবনা সবদিক থেকেই প্রবল। স্থায়ী নিবাসী কৃষি সমাজ প্রতিষ্ঠা (Settled agriculture) ও রোমান সাম্রাজ্যের উন্নতি যখন তার শিখর স্পর্শ করেছে -- এ দুয়ের মধ্যে সময়ের ব্যবধান আনুমানিক ছয় থেকে আট হাজার বছর। তবে ইতিহাসের সাক্ষ্য-প্রমাণের সাথে এই কাল পরিসরের মিল না থাকায় আমরা কেবল মাত্র অনুমান করতে পারি যে ইতিহাসের এ সুদীর্ঘ কালপরিক্রমায় যুদ্ধবিগ্রহ, বিশ্বাসঘাতকতা, চক্রান্ত ও হত্যাকাণ্ডের মধ্য দিয়ে অগুণিত রাজ্য, সাম্রাজ্য, নানান সভ্যতার আবির্ভাব, বিকাশ ও বিলুপ্তি ঘটায় নানা দৃশ্যের অশেষ মিছিল, যেমন আজও চলেছে। তবু ইতিহাসের সাক্ষ্য-প্রমাণ থেকে দেখা যায়, যে কোনো সভ্যতার বুনিয়াদ গড়ে ওঠে কোনো না কোনো ধরনের অর্থনৈতিক কাঠামোর ওপর ভিত্তি করে। এ কাঠামোতে ভর করে গড়ে উঠেছে অনেক বিশাল সাম্রাজ্য। এ সব সাম্রাজ্যের কোনো কোনোটি অস্তিত্ব রক্ষা করতে সক্ষম হয়েছে শত শত বছর। তাদের অর্থনৈতিক কার্যকলাপের সাফল্য তাদের রাজনৈতিক সাংগঠনিক কাঠামোর আলোকে নিরূপিত ও নির্ধারিত হয়েছে। উল্লিখিত ছয় থেকে আট হাজার বছরের কাল পরিসরে জনসংখ্যা নজিরবিহীনভাবে বৃদ্ধি পায়। মানববসতির স্থানগত ব্যাপ্তিও বেড়ে যায়। দৃষ্টান্ত হিসেবে বলা যায়, ভূমধ্যসাগরের তীরবর্তী অঞ্চলগুলি অত্যন্ত ঘনবসতিপূর্ণ হয়ে ওঠে এই আমলেই। এই কাল পরিক্রমায় শিকার — সংগ্রহের (hunting gathering) মানবীয় জীবিকার ক্রম উত্তরণ ঘটে কৃষিকর্মের পরিকল্পিত উৎপাদন তৎপরতা। আর পরিশেষে, কৃষিই হয়ে ওঠে স্থায়ী নিবাসী চরিত্রের প্রধান অর্থনৈতিক তৎপরতা।

ঐ একই সময়ে, প্রথমবারের মতো রাজনৈতিক রাষ্ট্র সংগঠনের প্রথম আবির্ভাবও ঘটে। রাষ্ট্রীয় অভ্যুদয়ের সাথে যুগপৎ আগমন ঘটে যুদ্ধ ও রাজনৈতিক অস্থিতিশীলতার। এ সময় প্রযুক্তির তাৎপর্যপূর্ণ বিকাশ ঘটে। উল্লিখিত আট হাজার বছরের মেয়াদে লৌহযুগ স্থলবর্তী হয় ব্রোঞ্জযুগের। ব্যবসায়-বাণিজ্যের বিকাশ ও সম্প্রসারণ ঘটে। এর অল্পকালের মধ্যেই বাজার গড়ে ওঠে। প্রথমবারের মতো পৌর এলাকার পত্তন হয়। নগরগুলির আকার-আয়তন ও নগর প্রশাসনের জটিলতা বেড়ে যায়। সেই সাথে নানা ধরনের অর্থনৈতিক তৎপরতা বেড়ে যায়। এক প্রান্তে সুমের ও মিসর পুনঃবণ্টনমূলক অর্থনৈতিক কার্যকলাপের প্রতিনিধিত্ব করে ও অন্য প্রান্তে মূল্যনির্ধারক বাজার সম্প্রসারণের প্রতিনিধিত্ব করে হেলেনীয় গ্রীস ও রোম। ঐ সময়ে বিভিন্ন ধরনের অর্থনৈতিক কার্যকলাপের ওপর ভিত্তি করে গড়ে ওঠে নানা ধরনের অর্থনৈতিক সংগঠন। একই সময়ে ব্যক্তি পর্যায়ে “সম্পত্তির মালিকানা ও অধিকার” প্রতিষ্ঠিত হয়। দাসত্বের আকারে এ সব অধিকার বিকশিত হয় পণ্য, ভূমি ও শ্রমকে নিয়ে। এই আমলেই তাৎপর্যপূর্ণ অর্থনৈতিক প্রবৃদ্ধি অর্জিত হয়। যার বুনিয়ে এক দিকে বর্ধিত জনসমষ্টির অস্তিত্ব রক্ষা সম্ভব হয় ও অন্যদিকে মানুষের জীবনযাত্রার সাধারণ মান উন্নত হয়।

সম্পদ ও আয়ের বণ্টনে অসমতা — প্রাচীনকাল

তবে ঐ একই সময়ে মানুষের আয়ের বণ্টনও বিষম হয় ওঠে। জীবন যাত্রার মান উন্নতির সাথে সাথে সমাজের নানা ধরনের পেশাজীবীর আয়ে আরও বেশি ও ব্যাপক বৈষম্য তৈরি হয়। মানবেতিহাসের অত্যন্ত গোড়ার দিকে এ সব ঘটনা ঘটে। এ ছাড়াও স্থায়ী নিবাসী কৃষিকর্মের সাথে সাথে বিভিন্ন সামাজিক ও অর্থনৈতিক সংগঠন গড়ে ওঠে। জমিতে কি ফসলের আবাদ করা উচিত, কোথায় তা আবাদ করা উচিত, কখন তা করা উচিত, ফসল কাটতে বা তুলতে হবে কখন, কেমন করে কে বা কারা কিংবা কোন আর্থসামাজিক সংগঠন ফসল বোনা ও কাটার মধ্যবর্তী মেয়াদে সম্পর্কিত কাজগুলি ভাগ করে দেবে - এ সব বিষয় অনেক বেশি জটিল হয়ে ওঠে। কারা কাজগুলি করবে সে বিষয়ে সিদ্ধান্ত নেওয়ার কাজটিও খুবই গুরুত্বপূর্ণ হয়ে ওঠে। তাছাড়া যে কোনো স্থায়ী নিবাসী জনসমাজে দুর্ভিক্ষ বা খরার মতো সম্ভাব্য দুর্দিনের জন্য পণ্য/ফসল ইত্যাদি মজুত করে রাখাও প্রয়োজন ছিল বিধায় তখনকার কৃষি জনসমাজে নতুন নতুন পেশা বা কর্মবৃত্তির সৃষ্টি হতে থাকে। খ্রিষ্টপূর্ব ২য় সহস্রাব্দে হস্তশিল্পে বিশেষ পারদর্শিতা অর্জিত হয়। কুমার, কামার, তাঁতী, রাজমিস্ত্রি, ছুতার, জাহাজ নির্মাতাদের আবির্ভাব ঘটে ঐ সময়ে। শ্রমের ক্ষেত্রে এ ধরনের বিশেষায়নের ফলে শিকার ও সংগ্রহ-নির্ভর যাযাবর এবং তুলনামূলকভাবে কম অসমঞ্জস বা সমজাতীয়সমাজে এক ব্যাপক পরিবর্তন আসে। বিশেষায়ন দ্রুত গতিলাভ করার ও এগিয়ে যাওয়ার সঙ্গে সঙ্গে আয়ের বৈষম্যও বাড়তে থাকে। কৃষিতে কারিগরি উন্নতি ও বৃহদায়ন শিল্প বিকাশের ফলে মধ্যযুগেই সম্ভবত আয়ের এই পার্থক্য অনেক বেশি বেড়ে যায়।

তবে আয়ের ব্যবধান সবচেয়ে লক্ষ্যণীয় হয়ে ওঠে আঠারো ও উনিশ শতকের শিল্প বিপ্লবের পর। ১৪২৭ সালে, ইতালির ফ্লোরেন্স নগরীর শতকরা ১০ জন অধিবাসী মোট সম্পদ ও বিত্তের শতকরা ৬৮ ভাগের মালিক ছিল। অন্যদিকে ঐ নগরীর শতকরা ৬০ জন অধিবাসী কেবলমাত্র শতকরা ৫ ভাগ সম্পদের মালিক ছিল। ষোলো শতকের তুরস্কে সামরিক বাহিনীর সদস্যবর্গ ও শাসকমহলের লোকজন তুর্কী জনসমাজের সবচেয়ে বেশি সম্পদ ও বিত্ত নিয়ন্ত্রণ করতো। ১৮ শতকের সুবে বাংলা তথা বঙ্গদেশ সবচেয়ে সম্পদশালী মুঘল প্রদেশ যার কেন্দ্র ছিল মুর্শিদাবাদ। ইউরোপে শিল্প বিপ্লবের আগে পাশ্চাত্যের দেশগুলিতে আয়ের পার্থক্য ছিল বিরাট। পাশ্চাত্যের ধনী ও গরিব জনসমাজের মধ্যে আয়ের ক্ষেত্রে ঐ বিপুল ব্যবধান অপেক্ষাকৃত কম উন্নত দেশের জনসমাজেরও বৈশিষ্ট্য হয়ে ওঠে। অবশ্য ১৮৫০-এর পর আয়ের এই সুবিশাল বৈষম্য উন্নত দেশগুলিতে কমে আসতে শুরু করলেও, কম উন্নত দেশগুলিতে বেড়ে যেতে থাকে। এর রেশ চলতে থাকে এক শতকেরও বেশি কাল ধরে। ১৯৭০-এর দশকের শেষভাগে উন্নত দেশগুলির জনসমাজের ভেতরে আয়ের ব্যবধান কমলেও, কম উন্নত দেশগুলিতে তা বাড়তে থাকে। এসব সমাজে কিছু কিছু লোক হঠাৎ ভাগ্যবলে ও সুযোগ পেয়ে ধনী হলেও তা ছিল নেহাৎই নিয়মের ব্যতিক্রম। ইদানিংকালে অর্থনৈতিক প্রবৃদ্ধির সাথে ক্রমান্বয়ে সম্পদ বাড়ছে, ধনী-দরিদ্রের বৈষম্য তারচেয়েও দ্রুত তগতিতে বেড়ে চলেছে।

মজুরি ও মুনাফার বিলি-বণ্টনে অসমতা — সাম্প্রতিককাল

অবশ্য সাম্প্রতিককালে নতুন নতুন প্রযুক্তির উদ্ভাবন ও প্রয়োগ পরিস্থিতির আরও একবার মোড় ঘুরিয়ে দিয়েছে। অর্থনীতি ক্রমেই বিশ্বায়িত হয়ে ওঠার আলোকে ‘তুলনামূলক সুবিধে’ এখন “প্রতিযোগিতামূলক সুবিধের” কাছে হার মানছে। এ নিয়মের আওতায় কোন বিনিয়োগকারী যদি বিশেষ কোনো শিল্প ক্ষেত্রে প্রতিযোগিতামূলক উৎপাদনে সমর্থ না হয়, তাহলে তাকে সে উৎপাদন বন্ধ করে দিয়ে অন্যত্র ভাগ্য পরীক্ষায় যেতে হবে। নতুন নতুন প্রযুক্তি উদ্ভাবনার কারণে নতুন নতুন পণ্য বাজারে আসে। ঐ সব দ্রব্য প্রায়ই দামে হয় কম, আর সংশ্লিষ্ট উদ্যোগ প্রতিষ্ঠানের মুনাফা হয় বেশী। নতুন প্রযুক্তি র ব্যবহারে শ্রমিকের উপাঙ্গিক উৎপাদন হার বৃদ্ধি পায়। শ্রমিক-কর্মী স্বাভাবিক কারণেই উৎপাদিত পণ্যের বর্ধিত মুনাফার ভাগ চায়। অর্থনীতির চাহিদা-সরবরাহ সূত্র অনুযায়ী যদি পুঁজির তুলনায় শ্রমিকের সরবরাহ কম হয় তাহলে তেমন ক্ষেত্রে শ্রমিকরা বেশি হারে মজুরি দাবি করতে পারে। যুক্তরাষ্ট্রে শ্রমিকের উৎপাদনশীলতা গত দু দশকে ক্রমাগত বাড়লেও দুর্ভাগ্যজনকভাবে তাদের মজুরি সেই হারে আগের শতকের মতো বাড়েনি। অথচ মুনাফা আরও বেড়ে গেছে। পরিসংখ্যান বিশ্লেষণে দেখা গেছে, মজুরি ও মুনাফার মধ্যে ব্যবধান ক্রমেই বেড়ে যাওয়ার প্রধান কারণ হলো দক্ষ শ্রমিকের চাহিদা বৃদ্ধি এবং অদক্ষ শ্রমিকের সরবরাহ বৃদ্ধির পাশাপাশি অদক্ষ শ্রমিকের চাহিদা হ্রাস। ঠিক এ কারণটিই বাংলাদেশে এখন ক্রিয়াশীল। তাই সমাজের বিভিন্ন জনগোষ্ঠীর মধ্যে আয়ের যে বৈষম্য বিরাজমান তার কারণ এটাই হতে পারে। অর্থনীতিবিদগণ এ ব্যাপারে হয়তোবা পর্যালোচনা করে আরও বিশদ ব্যাখ্যা দিতে পারবেন।

গত কয়েক দশকে যুক্তরাষ্ট্রের জনসমাজে একটা অপেক্ষাকৃত গরীব শ্রেণীর অভ্যুদয় ঘটেছে। আর তাতে প্রমাণিত হচ্ছে যে সমভিত্তিক উদার বাজার ব্যবস্থাপনার ভিত্তিতে গড়ে ওঠা অত্যন্ত ধনী জনসমাজেও দেশের সম্পদ-বিলবন্ধে ন্যায্যভাবে বিলি-বন্টন নিশ্চিত করা খুব কঠিন ব্যাপার। তবুও ইহা নিঃসন্দেহে প্রমাণিত যে অর্থনৈতিক প্রবৃদ্ধি হয়তো সম্পদের সমভিত্তিক বন্টন করতে পারেনা বা সকল সমস্যার সমাধান করতে না পারলেও ব্যবসা, বাণিজ্য ও বিনিয়োগের সম্প্রসারণ না করলে প্রবৃদ্ধির অনুপস্থিতিতে সমস্যা মোকাবেলা আরও বেশি কঠিন ও অপারিসীম হয়ে উঠে।

একথা তাই বিনা দ্বিধায় বলা যায় যে অর্থনীতির বিশ্বায়ণ ও তথ্য প্রযুক্তির দ্রুত ব্যবহারে আশু ভবিষ্যতে আয়, দারিদ্র্য ও বিত্তের ক্ষেত্রে অসমতা বিভিন্ন পর্যায়ে ও স্তরে বিভিন্ন চেহায়ায় দেখা দেবে। কম উন্নত দেশগুলির জন্য কঠিন সমস্যা হবে কম উন্নয়নের বৈশিষ্ট্যাবলি কাটিয়ে ওঠা। বলা বাহুল্য; এ দেশগুলির বৈশিষ্ট্য হলো ঐ সব দেশে ক্ষমতা গুটিকয় ব্যক্তির হাতে কেন্দ্রীভূত থাকে, যা উন্নয়ন ও প্রবৃদ্ধির আদৌ অনুকূল নয়। তাই যতই কঠিন হোকনা কেন প্রথম কাজটি হলো, কেন্দ্রায়িত ও পুঞ্জীভূত ক্ষমতা বিভিন্ন সামাজিক ও রাজনৈতিক গোষ্ঠীর মাঝে বিলিবন্টন করে ঐ ক্ষমতার ব্যবহারে একটা ভারসাম্যের বিধান করা।

ক্ষমতার অপব্যবহার ও সম্পদ নিয়ন্ত্রণের অনৈতিকতা

কুলিন ও অভিজাত মহলের হাতে যখন ক্ষমতা কেন্দ্রীভূত থাকে, তারা সে ক্ষমতার অপব্যবহার করে অনৈতিক ভাবে অতিরিক্ত সম্পদ করায়ত্ত্ব করার কারণে অপেক্ষাকৃত গরীব জনশ্রেণী ও নতুন উদ্যোক্তারা নতুন ব্যবসা-বাণিজ্য ও শিল্পে বিনিয়োগের মাধ্যমে তাঁদের দক্ষতা ও সৃষ্টিশীলতাকে কাজে লাগাতে পারে না। ফলে তারা তাদের ক্ষমতা ও দক্ষতানুযায়ী আয়-উপার্জন থেকে বঞ্চিত হয়। শাসক ও কর্তব্যাক্তিরা তাদের ক্ষমতার লাগামে টিল দিতে আগ্রহী নন কেননা সে রকম ক্ষেত্রে তাঁদের আশঙ্কা, তাঁরা তাঁদের ক্ষমতার যথেষ্ট ব্যবহার ও অপব্যবহারের মাধ্যমে সাম্রাজ্য নিয়ন্ত্রণের আনন্দ উপভোগ হতে বঞ্চিত হবেন। অবশ্য দেশের সুশীল জনসমাজ যদি প্রাণবন্ত, সজীব, উন্মুক্ত মনের হয়, তাহলে তা সেই সমাজে শাসকদের হাতে থাকা অতিরিক্ত ক্ষমতার বিলিবন্টন তথা বিকেন্দ্রায়নের প্রক্রিয়াটি সক্রিয় করে তুলতে সহায়তা করতে পারে। এটা করা সম্ভব সাধারণ মানুষের সম্মিলিত শক্তি, সামর্থ্য ও সাফল্য এবং খোলা বাজারের অমিত শক্তি কাজে লাগিয়ে। অন্যথায় একদিকে সম্পদ বিলিবন্টনে বৈষম্য দিন দিন বাড়বে, অন্যদিকে ক্ষমতাসীনদের বিরুদ্ধে অসন্তোষ ও সহিংসতা বাড়বে। অস্থির সমাজে জনগণ কারণে অকারণে একে অপরের বিরুদ্ধে অঘোষিত যুদ্ধে লিপ্ত হবে। উশুংখল মানুষের সমন্বয়ে গঠিত বিশুংখল সমাজ ধীরে ধীরে শাসনের অযোগ্য হয়ে পড়বে। সহিংস ও অস্থির সমাজে বিত্ত ও সম্পদ কমে যায়। শূন্য কোষাগার থেকে বিলি-বন্টনেরও কোন সুযোগ থাকেনা। তাতে সমাজে সম্পদের বৈষম্য আরো বেড়ে যায়।

এটা শুধু দেশের অভ্যন্তরে ধনী-গরীবের বেলায় নয়, বরং উন্নত ও কম উন্নত দেশের বেলায়ও প্রযোজ্য। দেশের সম্পদের বৈষম্যের ব্যবধান বাড়তে থাকলে দেশে ব্যবসা-বাণিজ্য ও বিনিয়োগ বাড়িয়ে অর্থনীতির পূর্ণ সম্ভাবনাকে কাজে লাগাতে হবে। সম্পদকে পূর্ণভাবে বিনিয়োগিত করে উৎপাদন বৃদ্ধির মাধ্যমে আয়ের অসমতা ও দারিদ্র্য কমাতে হবে। এটি নিশ্চিত করতে বাংলাদেশের বর্তমান আর্থ-সামাজিক ও অস্থিতিশীল রাজনৈতিক পরিস্থিতিতে একটি নতুন নৈতিক দর্শনের প্রয়োজনীয়তা রয়েছে। এই নতুন দর্শন অর্থনীতিবিদদের থেকে আশা করা অব্যক্ত নয়, যদিও সবার কাছেই এ বিষয়গুলো রাজনৈতিক ইস্যু বলে মনে হবে। বাস্তবিক পক্ষেও কাজগুলি রাজনৈতিক। তাই এ সব বিষয়ে নির্দেশনার জন্য জনগন রাজনীতিকদের মুখাপেক্ষী হয়ে থাকে। বাংলাদেশের সরকার ব্যবস্থায় কাঠামোগত নানা অভাব, গলদ-ত্রুটি - হিংসাত্মক রাজনীতির কারণে রাজনীতিকরা পরিবর্তনের প্রতি উপযুক্ত সাড়া দিতে ব্যর্থ হয়। তাই সুশীল সমাজের অন্যান্য সদস্য ও জনগণের সাথে তাল মিলিয়ে অর্থনীতিবিদদের উচিত প্রথমে রাজনৈতিক সমস্যার সমাধানে ভূমিকা রাখা। সত্যিকার অর্থে সমাজের আর্থ-সামাজিক উন্নয়নের জন্য অথবা দারিদ্র্য ও ধনী-গরীবের মধ্যে ব্যবধান কমাতে হলে প্রথমে কাজ হবে রাজনৈতিক সংস্কারে হাত দেওয়া।

নৈতিকতার দিক ও মাত্রা

নৈতিকতার নানা দিক ও মাত্রা আছে। ব্যক্তিগত সততা, ন্যায্য আচরণ, চুক্তি অনুযায়ী মূল্য পরিশোধ, যথাসময় দেনা পরিশোধ, অতিরিক্ত মুনাফা করার লোভ থেকে বিরত থাকা, যথাযথ পরিমাপ প্রদান, গ্রাহকের সাথে সত্য কথা বলা - এ সবই যেমন মানুষের ব্যক্তিগত নৈতিকতার সাথে জড়িত, তেমনি অর্থনীতির সাথে সম্পর্কিত। অর্থনীতির বাইরেও অনেক বিষয় আছে যেমন নীতিবোধ, পরিণামদর্শিতা, নীতিনিষ্ঠা, আদর্শ, গুণাবলি ইত্যাদি সামাজিক মূল্যবোধ নৈতিকতার সাথে সম্পর্কিত। তাছাড়াও আছে ধর্মীয় নৈতিকতা। সব ধরনের নৈতিকতাই অর্থনৈতিক প্রবৃদ্ধির জন্য সহায়ক পরিবেশ তৈরির সহায়ক ভূমিকা পালন করে।

অর্থনৈতিক প্রবৃদ্ধি ও উন্নয়ন, অর্থনৈতিক মন্দা বা স্থবিরতা যা-ই হোক না কেন, এ সব বিষয়গুলো সর্বদাই সমাজে সাধারণ মানুষের নৈতিকতার দিকমাত্রা নির্ধারণে প্রভাব ফেলে। নৈতিকতার সংজ্ঞা সম্পর্কে নানা ধরনের মানুষ নানা ধারণা পোষণ করেন বিধায় জনসমাজে নৈতিকতা নানা দিকমাত্রায় গঠিত। নানা অর্থনৈতিক বিষয় দৈনন্দিন জীবনের নানা উপাদানের জন্য গুরুত্বপূর্ণ। যেমন সবার জন্য অব্যাহত সুযোগ, সহনশীলতা, সামাজিক সচলতা ও গতিশীলতা, ন্যায্যতা ও গণতন্ত্র। এছাড়াও বহু বিষয় ও অভিমত আছে যেগুলি নৈতিকতার বর্ণনায় যোগ করা যায়। যেমন কর্মসংস্থান ও আয়, স্বাস্থ্য পরিচর্যা, শিক্ষা ও দক্ষতা অর্জন, কর্মজীবন থেকে অবসর গ্রহণের পর সামাজিক নিরাপত্তা, বাজেট ঘাটতি, সঞ্চয় ও বিনিয়োগ, চাহিদা ও যোগান, বাজারে পণ্যের মূল্য ইত্যাদি সব কিছুই আমাদের দৈনন্দিন জীবনে অর্থনীতির চর্চার সাথে জড়িত। অতএব অর্থনীতি কেবল সংখ্যা, সম্পদের বিলি-বরাদ্দ বা বাজার ব্যবস্থার বিষয় নয়, বরং এর সাথে রাজনীতি, ইতিহাস, বাণিজ্য, বিনিয়োগ, উৎপাদন, করারোপ, মুদ্রার বিনিময় হার এবং জীবনের প্রায় সব ক্রিয়াকাণ্ড জড়িত। আধুনিক অর্থনীতিতে প্রতিষ্ঠান, বিধিবিধান এবং কখন কোন পরিস্থিতিতে সরকারের হস্তক্ষেপ বা মধ্যবর্তিতার প্রয়োজন অথবা প্রয়োজন নেই এসব বিষয়কেও অত্র ভূক্ত করা হয়।

বাজার ব্যবস্থা বনাম সরকারের হস্তক্ষেপের ব্যাপারে আলোচনার সময় অনেকে আদর্শিক যুক্তিতর্কের সীমা ছাড়িয়ে যান। যদিও অর্থনীতির আলোচনায় রাজনৈতিক পক্ষ নেওয়ার কোনো বিষয় নেই। কে কোন রাজনীতির সাথে জড়িত, কে কোন দলের সাথে জড়িত, অর্থনীতিতে সেটা কোন প্রাসঙ্গিক ব্যাপার নয়। অর্থনীতি যেমন; কোনো ব্যবসা বা শ্রমিক সংগঠনকে সমর্থনের বিষয় নয়, তেমনি রাজনীতিতে আওয়ামী লীগ, বিএনপি বা কোন রাজনৈতিক দলকে সমর্থনের কোনো বিষয় নয়। একজন ব্যক্তি মানুষের জন্য অর্থনীতি হলো; “নিজ স্বার্থ উদ্ধার” বা নিজের জন্য মুনাফা করা। তিনি হতে পারেন - ব্যবসায়ী, পণ্য উৎপাদক, পণ্য বিপণনকারী, বা হতে পারেন আইনজীবী, শিক্ষক, চিকিৎসক, এমনকি রাজনীতিক। সমাজ গড়ার জন্য স্বীয়স্বার্থ উদ্ধার ও স্বীয়-অধিকার প্রতিষ্ঠা একটা কার্যকর উপায় বলে ধারণা করা যায়। কেননা বাজারের

দৈনন্দিন লেনদেন “আত্মস্বার্থ নির্ভর”। অর্থনীতি শাস্ত্রের প্রতিষ্ঠাতা অ্যাডাম স্মিথ যুক্তি দেখিয়ে বলেছেন, “সাধারণত সকল ব্যক্তি, বাস্তবিকপক্ষেই কোন ব্যক্তিরই, যেমন জনস্বার্থকে উন্নীত করার কোন অভিপ্রায় থাকেনা, তেমনি সে এও জানে না যে তার কর্মপ্রক্রিয়ার মাধ্যমে সে কতটুকু জনস্বার্থ উন্নীত করছেন। প্রত্যেক ব্যক্তির অভিপ্রায় হলো তার নিজ নিরাপত্তা বিধান; নিজের লাভ-মুনাফা নিয়ে ব্যতিব্যস্ত থাকা। ঐ ব্যক্তি অনেক সময় তার লক্ষ্য ও উদ্দেশ্য কি বা কোন লক্ষ্য অর্জনে কাজ করছেন সে নিজেই জানে না। মনে হয় ঐ ব্যক্তির কাজকর্ম অদৃশ্য হাত দ্বারা পরিচালিত। এসব কাজ সমাজের জন্য যে খারাপ তা-ও নয়। বরং দেখা যায়, একজন ব্যক্তি যখন নিজের স্বার্থ অন্বেষণ করেন, একই সাথে তিনি সমাজের স্বার্থও উন্নীত করছেন, যদিও মোটেই এটা তার অভিপ্রায় ছিল না”।

অতএব যখন কোন ব্যক্তি কার্যত নিজের স্বার্থ উদ্ধারে ব্যস্ত, তার ঐ কাজের মাধ্যমে সমাজের অন্যেরাও উপকৃত হতে পারে। দৃষ্টান্ত হিসেবে; কোন উদ্যোক্তা যদি একটা উন্নতমানের পণ্য তৈরি করে সস্তায় বিক্রি করে, তাতে উন্নত পণ্যের উপর অর্জিত মুনাফা যেমন স্বীয়স্বার্থকে সমুল্লত রাখে, তেমনি পণ্যের কম মূল্য সমাজে অনেকের জীবনমান উন্নয়নে সহায়ক ভূমিকা পালন করে। অতএব স্বীয়স্বার্থ অন্বেষণের প্রক্রিয়ায় একজন ব্যক্তি কতো মুনাফা করলেন সেটা নৈতিক-অনৈতিকতার বা ঐ ব্যক্তি কতোখানি অনৈতিক সেটা বিচার্য বিষয় নয়, বরং বিচার্য বিষয় হলো; কম মূল্যে পণ্য উৎপাদন ও বিক্রয়ের মাধ্যমে ক্রেতার সহায়তা হলো মূখ্য বিষয়। মোট কথা হলো ব্যক্তির ‘আত্মস্বার্থ’ উদ্ধারের কাজটাও অনেক সময় সমাজের সামগ্রিক স্বার্থ অর্জনে এক শক্তিশালী হাতিয়ার হতে পারে। তবে সামগ্রিকভাবে তা নির্ভর করে কতটুকু যথার্থভাবে কাজটি পরিচালিত হয়েছে।

প্রত্যেক মানুষ নিজেেকে একজন অর্থনীতিবিদ মনে করতে পারেন। অথবা বলা যেতে পারে অর্থনীতির দৈনন্দিন চর্চাকারী। এটা মোটেই অযৌক্তিক নয়। কেননা, সবাই বেঁচে থাকার জন্য কাজ করছেন; ভবিষ্যতের জন্য সঞ্চয় করছেন; কোন না কোন পণ্য বা সেবা ক্রয় বা উৎপাদনে নিয়োজিত আছেন; কর দিচ্ছেন; নিজের ভরণপোষণের জন্য দৈনন্দিন মুদি দোকান থেকে কেনাকাটা করছেন। এসবই অর্থনীতির উপাদান।

সম্পদ সৃষ্টির প্রক্রিয়া

অর্থনীতি কেবল ‘বিরল সম্পদ বিলিবন্টনের’ চর্চা বললে ভুল হবে। যেমন তেল ও গ্যাস; এ দুটোই বিরল সম্পদ। তবে এটি নিজ থেকে আপনাআপনি কোন সম্পদ নয়। প্রাকৃতিক সম্পদ যেমন গ্যাস মানুষের মালিকানায় থাকা এই গুরুত্বপূর্ণ হাতিয়ার বা সাধনী। এ হাতিয়ারের ব্যবহারে যেসব বাধাবিপত্তি আছে সেগুলো কাটিয়ে ওঠা সম্ভব হলেই কেবল তা মানুষের কল্যাণে সত্যিকারের ‘সম্পদ’ হয়ে উঠতে পারে। গ্যাসের মতো অনিশ্চিত উদ্বায়ী জিনিসকে ঠিক সরাসরি ‘সম্পদ’ বলা যায় না। বরং একে কোনো মিশ্র বা সমষ্টি সম্পদের অংশ বলাই সম্ভব। কেননা, কোনো নির্দিষ্ট সময় (কাল) ও স্থানে (দেশ) প্রাকৃতিক গ্যাস বা এ জাতীয় পদার্থ উপকারী ‘সম্পদ’ হিসেবে কাজে লাগবে কিনা তা নির্ধারণের প্রক্রিয়ায় উপাদান, বস্তু, শক্তি, অবস্থা, শর্ত, সম্পর্ক, স্থাপনা, বিপণন ও নীতি ইত্যাদির এক জটিল সমষ্টি হিসেবে একযোগে ক্রিয়াশীল হলেই প্রাকৃতিক গ্যাস ‘সম্পদ’ হিসেবে বিবেচিত হতে পারে।

এ কারণে তেল, কয়লা ও গ্যাসের মতো প্রাকৃতিক কাঁচামালকে সম্পদ না বলে বরং বলা উচিত মানব কল্যাণের জন্য এগুলি এক মিশ্র ও সমন্বিত সম্পদের অংশবিশেষ। তাই এ ধরনের সম্পদকে শুধুমাত্র অনেকগুলি উপাদান যেমন, বস্তু, শক্তি, প্রযুক্তি, আবিষ্কার, প্রক্রিয়াকরণ, শোধান, অবস্থা, সম্পর্ক পরম্পরা, প্রতিষ্ঠান, বাজার, নীতি, বিপণন — এগুলির এক জটিল মিশ্রণ বা দ্রবণ বলে উল্লেখ করা যেতে পারে। এসব বিষয়ের পারস্পরিক সম্পর্ক, প্রক্রিয়াকরণ ও প্রযুক্তির ব্যবহার ইত্যাদি সব মিলে শেষ পর্যন্ত নির্ধারণ করে

প্রাকৃতিক গ্যাস বা এ ধরনের কাঁচামাল কিভাবে একটি নির্ধারিত সময় ও স্থানে মানুষের জন্য কল্যাণকর সম্পদ হিসেবে ব্যবহৃত হতে পারে। অতএব এ ধরনের সম্পদকে শুধুমাত্র একটি নির্ধারিত অভীষ্ট লক্ষ্য অর্জনের “উপায়” হিসেবে সংজ্ঞায়িত করতে হবে। অর্থাৎ আমাদের বুঝতে হবে যে ব্যক্তি ও সমষ্টি চাহিদা পূরণের প্রয়োজনীয় উপকরণের নামই সম্পদ। বস্তুত ‘উপায়’ তার ‘তাৎপর্য ও অর্থ’ খুঁজে পায় মানুষের অভীষ্ট লক্ষ্য ও উদ্দেশ্য পূরণের মধ্যে। মানুষের অভীষ্ট লক্ষ্য বারবার বদলায়, অভীষ্ট বদলানোর সাথে সাথে ‘উপায়’ও বদলায়, আর মূল্যমানের দিক থেকেও এ পরিবর্তন অনিবার্য।

সম্পদ সৃষ্টি ও আয়ের অসমতা

উদ্যোক্তারা নিরন্তর তাঁদের কার্য-প্রক্রিয়ার মাধ্যমে এধরণের বিরল সম্পদকে সুলভ করে তোলেন এবং আজকে মানুষের কাছে যেসব পণ্য বিলাসিতা, ভবিষ্যতে একই পণ্যকে মানুষের জীবন মানোন্নয়নে নিত্যপ্রয়োজনীয় সামগ্রীতে রূপান্তরিত করেন। দৃষ্টান্ত হিসেবে; গাড়ি, সেলফোন, ও কম্পিউটার। শত বছর আগে মাত্র হাতে গোনা কিছু লোক ছাড়া কারও গাড়ি কেনার সাধ্য ছিল না। কিন্তু আজ আর সে অবস্থা নেই। গাড়ি এখন উন্নত বিশ্বের প্রতিটি পরিবার বা সংসারের জন্য অপরিহার্য প্রয়োজনীয় একটি পণ্য। ১৯৯০-এর দশকে সেলফোন আকারে ও ওজনে ছিল বেশ বড় ও ভারী। একটা বাক্সের মতো। আমার সেল ফোনটা বয়ে নেওয়ার জন্য আলাদা একটা লোকের দরকার হতো। আজকে সেলফোন আকারে ছোট, দামে সস্তা। সকলেই এখন সেলফোন ব্যবহার করে। সেলফোন এখন স্বাভাবিক জীবনযাত্রায় নিত্য প্রয়োজনীয় পণ্য। পণ্যের এই রূপান্তরকরণের প্রক্রিয়ায় উদ্যোক্তারা সাধারণ মানুষের জীবনমাত্রার মান উন্নয়নে তাঁদের জ্ঞান ও দক্ষতাকে আমাদের বাস্তব জড়জগতে প্রয়োগ করেন। এ হলো উদ্যোক্তাদের উদ্ভাবনী ক্ষমতার সূফল।

তাই অর্থনীতি কেবল সম্পদ বিলি-বরাদ্দের বিষয় নয়, বরং অকেজো, অনুপযোগি, বেছন্দা বা অনর্থক দ্রব্য বা পদার্থকে রূপান্তরের মাধ্যমে দরকারি, কার্যকর ও উপকারী সম্পদ সৃষ্টি করাও অর্থনীতির বিষয়। এই রূপান্তরকরণের প্রতিটি স্তরে উদ্যোক্তা তার উদ্যোগ ও মূলধন ব্যবহারের মাধ্যমে নিজের জন্য সম্পদ সৃষ্টি করে। সম্পদ সৃষ্টির এই স্তরগুলোতে আয়, মজুরি ও মুনাফার বিলি-বণ্টনে অসমতা ও বৈষম্য সৃষ্টি হওয়া অস্বাভাবিক কিছু নয়।

সম্পদ সৃষ্টি ও নৈতিকতা

সম্পদ সৃষ্টির বড়ো উৎস হলো মানুষের মস্তিষ্ক ও মনন ও পুজি বিনিয়োগে বুকি। জ্ঞান ও দক্ষতার ব্যবহার এবং ঝুঁকি গ্রহণ করে একজন উদ্যোক্তা যতো আয় করেন বা লাভ করেন ততো অর্থ তাঁর প্রয়োজন নেই। তাঁর প্রয়োজন মেটাতে সৃষ্ট সম্পদের সামান্য অংশই যথেষ্ট। তবে উদ্যোক্তা দিন দিন পণ্য ও সেবা উৎপাদনের মাত্রা বাড়ায় এবং পণ্যের গুণগত মান উন্নয়নে সচেষ্ট থাকে। পণ্য উৎপাদনের মাত্রা ও মান উন্নত করে মূল্য কমানোর প্রয়াসে তাকে সঞ্চিত মূলধন থেকে পুনর্বিনিয়োগ করে যেতে হয়। এ প্রক্রিয়া একদিকে যেমন উদ্যোক্তার সম্পদ প্রতিনিয়ত বৃদ্ধি করে, অন্যদিকে উন্নত গুণমান সম্পন্ন পণ্য কম মূল্যে সরবরাহের মধ্য দিয়ে ভোক্তার জীবনমান উন্নীত করে। এমনি করে সমাজে অনেকে উপকৃত হয় ও সেহ সাথে উদ্যোক্তার সম্পদও বহুগুণে বেড়ে যায়। নিজের জন্য সম্পদ সৃষ্টি এবং একই সাথে সমাজে অন্যদের জন্য নিরবচ্ছিন্ন সুবিধে সৃষ্টি করা হলো উৎপাদনের এক গতিময় প্রক্রিয়া। এই প্রক্রিয়া একদিকে মানুষের উদ্যোগ ও উদ্যমের সূচু ব্যবহার করে। অন্যদিকে অধিকতর পরিমাণে উন্নতমানের পণ্য উৎপাদন ও সরবরাহের প্রেরণা জোগায়। যথাযথ সরবরাহ থাকলে, পণ্যের মূল্য সস্তা (বাজারভিত্তিক) থাকবে। এ হলো অর্থনীতির তত্ত্ব। প্রথিতযশা মার্কিন সাংবাদিক ওয়াল্টার লিপম্যান তাঁর ‘দ্য গুড সোসাইটি (১৯৪৩)’ গ্রন্থে লিখেছেন; মানবেতিহাসে প্রথমবারের মতো মানুষ “সম্পদ তৈরির একটা পথ খুঁজে পেয়েছে, যে পথ অবলম্বনে উদ্যোক্তার সৌভাগ্য বহুগুণে বেড়ে যাওয়ার সাথে সাথে অন্য সব মানুষেরও সৌভাগ্য সুচিত হয়”। এ প্রক্রিয়া শেষ পর্যন্ত অর্থনীতিতে একটা নির্ভরযোগ্য সোনালী নিয়মে পরিণত হয়ে ওঠেছে। এ প্রক্রিয়া উৎপাদন ও অর্থনীতির দৃষ্টিকোন থেকে যথার্থ ও

সুষ্ঠু। সাথে সাথে এ প্রক্রিয়া এমন এক পরিবেশ সৃষ্টি করতে সক্ষম হয়েছে, যেখানে “মানুষ প্রথমবারের মতো এমন এক শৃঙ্খলাবদ্ধ সমাজ সৃষ্টি করতে সক্ষম হয়েছে। সেই প্রাচীনকাল থেকে মানুষ সমাজে যে স্বাধীনতা, ভ্রাতৃত্ব ও সমতা ও নৈতিকতা আশা করেছিল, তার সাথে সামঞ্জস্যপূর্ণ। যে সমাজে একদিকে যেমন সম্পদ বাড়বে, অন্যদিকে অভাব থাকবেনা”।

প্রাচীনকাল বনাম সাম্প্রতিককাল

তবে বর্তমানে এই ধারার চিন্তা ভাবনা বদলে গেছে। অনেকেই এখন ধারণা করেন যে, “একজন ব্যক্তি মানুষের মুনাফার নিহিতার্থ হলো আরেকজনের লোকসান”। এ ধারণা পোষণকারীরা সম্পদ সৃষ্টিকে দারিদ্র্যতা ও অভাব তৈরির উৎস হিসেবে গন্য করেন। আমার বিশ্বাস এই দৃষ্টিভঙ্গি অনুন্নত অর্থনীতির একটা গুরুত্বপূর্ণ বৈশিষ্ট্য”। এই দৃষ্টিভঙ্গির মর্মার্থ হলো; “প্রতিটি ব্যবসায়ী তার কর্মচারী ও গ্রাহকবর্গকে ঠকাচ্ছেন। সে নিত্য নিয়ত প্রতারণা করে। সে আয় গোপন রেখে সরকারের কর ফাঁকি দেয়। যদি সে কর ফাঁকি না দিতো তাহলে সরকার সেই সম্পদ পুনর্বন্টনের মাধ্যমে সমাজে বৈষম্য ও অসমতা দূর করতে পারতো। সমাজে বহু মানুষের মানসপটে এই ধারণা উজ্জ্বলরূপে পরিস্ফুট। এতে বোঝা যা যে তাঁরা সামাজিক অসমতা ও বৈষম্যে সৃষ্টির উৎসকে একমাত্র সম্পদ সৃষ্টির মাঝেই খোঁজেন। এখানেই অর্থনীতি নৈতিকতার কাছে হার মানে।

সমাজে যতোদিন এমন ধ্যান-ধারণা বিরাজ করবে, যেমন সম্পদের পুনর্বন্টন হলো অসমতা ও বৈষম্য দূরীকরণের মোক্ষম হাতিয়ার। ততোদিন দারিদ্র্য যেমন দূর হবেনা, তেমনি বৈষম্য ও অসমতাও কমবেনা। কননা সম্পদ পুনর্বন্টনের জন্য প্রথম কাজটি হলো সম্পদ সৃষ্টি। সম্পদ সৃষ্টির মাঝে কোন না কোনভাবে বৈষম্য ও অসমতা বিরাজমান। অপরদিকে সম্পদের পুনর্বন্টন ও রাজনীতি এ দুটো বিষয় একে অপরের ছায়ার মতো। সদাসর্বদা কাছাকাছি থাকে। দিনের শেষে এ সমস্যার সম্বোধন ও সমাধান নির্ভর করে দেশের রাজনীতি, রাজনৈতিক ব্যবস্থা ও রাজনীতিকদের উপর। তাই অনিবার্যভাবেই যে কোন দেশে রাজনীতির উৎকর্ষ-মান, রাজনীতিকদের পরিণামদর্শিতা, নীতি, নৈতিকতা, নিয়মনিষ্ঠা ও তাঁদের নিজ গুণাবলির উৎকর্ষের মাঝে নিহিত থাকে সমাজে বৈষম্য, অসমতা ও নৈতিকতার মাত্রা বা পরিমাণ। ব্যবসায়ী, অর্থনীতিবিদ বা সুশীল সমাজের অন্যান্য গোষ্ঠী সমাজে নৈতিকতার মাত্রা উন্নয়নে সহায়ক শক্তি হিসেবে কাজ করতে পারে বটে, তবে কোনদিন বৈষম্য ও অসমতা দূরীকরণের মাধ্যমে নৈতিকতার পরিমাণের নির্ধারক হতে পারবে না।

অগণতান্ত্রিক একনায়কত্বের নৈতিকতা

সাধারণ মানুষ আশা করেছিল, স্বাধীনতা এদেশে নৈতিকতার ভিত্তিতে রাজনৈতিক স্বাধিকার, সামাজিক অগ্রগতি এবং অর্থনৈতিক সাফল্য আনবে। কিছুই হয়নি তা বলা যাবেনা। তবে তা আশার তুলনায় নগন্য। যেটুকু সাফল্য অর্জিত হয়েছে সেটুকু নৈতিকতাভিত্তিক কিনা বলা বড় মুশ্কিল। এতে যা হওয়ার তাই হয়েছে। দিনদিন জনগণের সেই স্বপ্ন দুঃস্বপ্নে পরিণত হচ্ছে। তাদের আশা বার বার নিরাশায় পর্যবসিত হয়েছে। জনগণের গণতান্ত্রিক অধিকার হরণ করে ক্ষমতা দখল করেছে স্বৈরশাসন। আবার কখনও প্রতিষ্ঠা করা হয়েছে স্বৈরশাসনের পরিবর্তে গণতান্ত্রিক একনায়কত্ব, জনগণ সত্যিকার গণতন্ত্রের স্বাদ কখনো পায়নি। প্রকৃতপক্ষে অগণতান্ত্রিক রাজনৈতিক অবকাঠামো নির্ভর সমাজে একই সাথে অর্থনৈতিক, আর্থিক ও সামাজিক ভিত্তি নির্মাণের প্রচেষ্টা ছাড়া শুধু গণতন্ত্র প্রতিষ্ঠার চেষ্টা বিপদ ও ভয়াবহ সংকটকে আমন্ত্রণ জানানো ছাড়া আর কিছু নয়। আমাদের অকপটে স্বীকার করতেই হবে যে, একটি উন্নত অর্থনৈতিক ও সামাজিক ভিত্তির লক্ষ্য থেকে আমরা অনেক দূরে অবস্থান করছি। বর্তমানের কথাই ধরা যাক, এখনও জনসংখ্যার শতকরা ৩০ ভাগ লোক দারিদ্র্যসীমার নিচে বাস করে। জাতি গঠনে ইচ্ছুক এবং উৎপাদনমুখী কাজে অংশগ্রহণে সক্ষম লক্ষ কোটি মানুষ হয় বেকার, অর্ধ-বেকার কিংবা অনুৎপাদনশীল।

উন্নত জীবনের আশায় তারা সুযোগ পেলেই সরকার বদল করেছে। স্বৈরশাসনের পরিবর্তে নির্বাচিত সরকার ও গণতান্ত্রিক ব্যবস্থাও চালু করার চেষ্টা করেছে। তারা দেখেছে, এতে মুষ্টিমেয় কিছু সংখ্যক লোকের ভাগ্যের পরিবর্তন হলেও দরিদ্র জনগোষ্ঠী সেই তিমিরেই রয়ে গেছে। দিন দিন পিছিয়ে পড়ছে। চারপাশের সবকিছু দেখে তারা হতবুদ্ধি,

হতভম্ব – ক্রমশ নির্বাক হয়ে যাচ্ছে। সমস্যা জর্জরিত এই বৃহৎ জনগোষ্ঠী তাদের চাহিদার কথা, আকাংখার কথা, সামাজিক অসঙ্গতির কথা আজ মুখ ফুটে বলতে বা প্রকাশ্যে উচ্চারণ করতেও যেন ভয় পায়। করতে চাইলেও পুলিশ দ্বারা বাধাপ্রাপ্ত হয়। অগণতন্ত্রবাদীদের মুখে নিত্য-নিয়ত শোনা যায় যে দেশে গণতন্ত্র প্রতিষ্ঠিত হয়েছে। তাই সেই চূড়ান্ত সময় এখন আমাদের জন্য সমুপস্থিত যখন আমাদের সিদ্ধান্ত নিতে হবে সমাজকে গণতন্ত্রায়নের মাধ্যমে সুশাসন গড়তে শুরু করার। এ পরিস্থিতিতে বাংলাদেশের মতো উন্নয়নশীল বিশ্বের দেশগুলির জন্য প্রথম ও সর্বাত্মক করণীয় হলো “নিজেদের ঘর সামলানো, যাতে অর্থনীতি বিকশিত হয়। তুলনামূলক ও প্রতিযোগিতামূলক সুবিধের নীতির মাধ্যমে শিল্পোন্নত দেশগুলির সাথে প্রতিযোগিতায় সক্ষম হয়ে উঠে”।

বাংলাদেশে রাজনৈতিক অস্থিরতা, সামাজিক বিশৃঙ্খলা, কতিপয় ব্যক্তির হাতে পুঞ্জীভূত ক্ষমতা, তাঁদের স্বৈরতান্ত্রিক ও অসাংবিধানিক আচার-আচারণ, আইনের শাসনের দুর্বলতা, অকার্যকর প্রতিষ্ঠান, বিধি-বিধানের অতিমাত্রায় অপব্যবহার ও নিচুমানের দুর্বল শাসন ব্যবস্থা বর্তমানে বড়োরকমের জরুরি মাথাব্যথা ও উদ্বেগের কারণ হয়ে দাঁড়িয়েছে। নিচুমানের শাসন দ্রুত প্রবৃদ্ধি অর্জন ও দারিদ্র্য হ্রাসের পথে এখন এক পর্বত সমান বাধা। শাসনে দুরবস্থা জাতীয় অর্থনীতি, আর্থিক ব্যবস্থা ও প্রতিষ্ঠানগুলিকে কুরে কুরে খাচ্ছে। বাংলাদেশকে টেনে নিয়ে যাচ্ছে অবনতির অতল গহ্বরে। সেই সাথে দেশের শ্রমজীবী মানুষগুলিকে তাদের সম্ভাবনা ও সুযোগ থেকে দূরে সরিয়ে দিচ্ছে। তাদের প্রাপ্য সামাজিক ন্যায়বিচার, সম্প্রীতি, নিরাপত্তার পরিবেশ ও নিত্যনূতন প্রযুক্তি উদ্ভাবনের সুফল কেড়ে নিচ্ছে।

উপসংহার

বাংলাদেশ এখন তার নিয়তির নানা পথের এক মিলন মোহনায় এসে থমকে গেছে। এ সত্য মেনে নিতেই হবে যে আগামী কয়েক দশকের পরিক্রমায় বাংলাদেশের সাফল্য বা ব্যর্থতা নির্ভর করবে দেশে গণতন্ত্র, সুশাসন, রাজনৈতিক ও সামাজিক মূলধন সৃষ্টির মাধ্যমে আর্থিক বিনিয়োগ বাড়ানো। আর সেজন্যই আমাদের জনসমাজে একটা সুগভীর পরিবর্তন আনা প্রয়োজন। সমাজের পরিপূর্ণ অর্থনৈতিক সম্ভাবনাকে বাস্তবায়িত করতে, আয়ের বৈষম্য এবং ধনী ও গরিবের ব্যবধান কমাতে হলে অর্থনীতিবিদ, ব্যবসায়ী, আইন বিশারদ, সমাজ কর্মী, বেসরকারী উন্নয়ন সংস্থা, ট্রেড ইউনিয়ন কর্মী তথা সুশীল সমাজের সবাইকে অবশ্যই চিরায়ত উদারনৈতিকতার দর্শনকে সামনে রেখে দেশের রাজনীতি, আইনের শাসন, সামাজিক মূলধন সৃষ্টি, উৎপাদন প্রক্রিয়া ও অর্থনৈতিক উন্নয়নের পথে সকল বাধাবিপত্তি সরাতে হবে। আমার দৃঢ় বিশ্বাস, আমাদের সমবেত প্রয়াসে দেশে অর্থনৈতিক প্রাণচাঞ্চল্য ও গতিশীলতা ফিরে আসবে, বিনিয়োগ বাড়বে, সম্পদ বাড়বে, অধিকহারে কর্মসংস্থান সৃষ্টি হবে, সাথে সাথে দেশের মানুষ তাঁর অর্জিত জ্ঞান ও দক্ষতাকে কাজে লাগাতে পারবে এবং তাতে করে একদিকে সামাজিক অস্থিরতা প্রশমিত হবে, অন্যদিকে আর্থিক মূলধন বিনিয়োগ বাড়বে এবং সম্পদ ও আয়ের বিলি-বণ্টনে বৈষম্য কমে আসবে। অন্যথায় বাংলাদেশের লাখে কোটি মানুষ বহুমাত্রিক বৈষম্য ও অনৈতিকতার গতিময় পথের পাশে দাঁড়িয়ে অসহায়, নীরব ও স্থবির দর্শকের মতো শুধু দেখেই যাবে “মানব সৃষ্টি এক ভয়াবহ দুর্যোগের নির্মম প্রলয় নৃত্য”।

মোট শব্দঃ ৮২১৯